

A·CHIK GOLPORANG

(GAR0 FOLKLORE)

BAK III

PUBLISHED BY

TURA BOOK ROOM

Tura, Garo Hills, Meghalaya

1984

Acc. No. 8704

Class No. _____ Book No. SAN'E

Author Sangma K. Thonousang

Title Achik Golporang

DISTRICT LIBRARY
EAST GARO HILLS DISTRICT
WILLIAM NAGAR

Accession No. _____

1. Books may be retained for a period not exceeding *fifteen days* by members.
2. Books may be renewed on request at the discretion of the Librarian.
3. Dog-earing the pages of a book, marking or writing therein with ink or pencil, tearing or taking out its pages or otherwise damaging it will constitute an injury to a book.
4. *Any such injury to a book is a serious offence; Unless the borrower points out the injury at the time of borrowing the book he shall be required to replace the book or pay its price.*

Help to keep the book fresh and clean

A·CHIK GOLPORANG

(GARO FOLKLORE)

BAK III

By

DHORONSING K. SANGMA

(Retired School Teacher, Tura)

8704
2/4.96.
Dug

PUBLISHED BY


TURA BOOK ROOM

Tura, Garo Hills, Meghalaya.

1984

All Rights Reserved

Gittamgipa Chapa Kani.
1984



Printed by IMPRESSIVE IMPRESSION
10, Dr. Kartick Bose Street, Calcutta-700 009.

JANAPCHENGANI

A-CHIK GOLPORANG Bak gittam (Part III)
Ian bringimin kata ong'a. Maina paa ma'arang
an'tangtangni knagimin aro poraigiminrangko
dedrangna agane on'ronga. Uarangkoba seaha
Da'oba sedapanirang dongtaiaha. Haida gualani-
rang dongengnaba donga. Pilak dakchakgiparang-
ko mitela.

Kitapko chapa ka'anio lekkani damrang rak-
dodoanichi ia kitapko palronga damna batkale
palna nanganiba ong'aha.

Bree poraigiparangko mitela.

*'Ango tangka sona gri, indiba ang'o je gnang
uko nang'na on'a.'*

Tura
the 23rd January 1974.

D. K. SANGMA,
Rtd. School Teacher

KATTA BICHONGRANG

1.	Muniko Manchengani.	1
2.	Silchiko Man'a.	7
3.	Do'oko Man'chenga.	8
4.	Kilko Man'a.	9
5.	Miko Man'a.	12
6.	Wa'alko Man'a.	14
7.	Sal aro Jajong.	16
8.	Susime.	18
9.	Askirang.	18
10.	Saljong.	23
11.	Goera.	24
12.	Kalkame.	25
13.	Nawang.	26
14.	A'gilsakko Daka.	27
15.	Mandeko Daka.	30
16.	A'gamchenga.	30
17.	Bisi—Bijong.	31
18.	Sal aro Jajongni Kam.	32
19.	Mikka Del'ip.	33
20.	A'gilsak Dalgapa.	34
21.	Nawang Minoka.	35
22.	Mikka Balwako A'rika.	35
23.	Salgrua.	36
24.	Mi Miskio Okamani.	38
25.	Do'amek.	39
26.	A'chikrangni Bebera'ani.	42

27.	Do'aran.	45
28.	Me'tra Pante.	46
29.	Timan.	52
30.	Mongma Aro Makkre.	54
31.	Makkre Aro Aringga.	57
32.	Do'de Aro Do'sing.	60
33.	Matcha Nokma.	62
34.	Tengton I	63
35.	Tengton II	66
36.	Tengton III	68
37.	Tengton IV	71
38.	Tengton V	74
39.	Mikdo Chawari.	78
40.	Tom'tomani.	81
41.	Nokkol Gisim.	83
42.	Mongma Aro Mande.	84
43.	Mapil Aro Mande.	85
44.	Makkre Aro Do'mesal.	86
45.	Janiani.	88
46.	Jaringa.	91
47.	Ja Ba'a.	92
48.	Bimung.	93
49.	Mangona Ba Mangroa.	93
50.	Na'a Bebe Ra'ama.	94
51.	Gipin Kattarang.	96
52.	Rangrupa.	98
53.	Debra Su'gala.	100
54.	Renggok.	101
55.	Do'bakchil.	103

56.	Nokma Songa.	104
57.	Saa Rika Ba Bang Rika.	106
58.	Do'si Do'dokao Mingani.	108
59.	Do'simao Doro Rin'gani.	110
60.	Me'chikni Maharini Doroani.	113
61.	Me'asani Mahari Doroskaani.	115
62.	Me'chikni Maharini Doroatani.	116
63.	Me'asani Mahari Dorochaktaia.	117
64.	A'chik Pagitchamrangni Chanani.	117
65.	A'chik Pagitcham-rang-ni Sal Chane Mingani.	118
66.	Demechik Sio Ma'gipani Minge Grapani.	119
67.	A'chik Kattani Aganbewal.	120
68.	Do'o Aro Matburungni Bimung.	122
69.	Gipin Kattarang.	123
70.	Ku'jikse Aro Aganmeapa.	125
71.	Nokpante.	134
72.	Jik Se Dongani.	136
73.	Asi Aro Malja.	137
74.	Garo Hills Ba A'chik A'song.	138

MUNIKO MANCHENGANI

Chengo Niba Jonja minggipa, an'tangni nokpante jamsirengo asonge dongmitingo doselbal do'mandalko mandal bibalni bitchiko ringengako nikataha. Ua do'oko man'na sike chri brachi gona chanchiaha. Ua chri brako gona skang 'Nanga kakolo nangbo, joka simchi charako jokbo' ine agane chri site goatahaon, kabako nangeoa do'selbal do'mandal bile katangaha Uko Niba Jonja jakurike jama sane niangaha. Ua do'o Aje Gilje Tirani nokantengni cha'chedamo ga'ake sieaha. Aje Gilje Tira srek wate anao, duru nokma songao, Mema megil oke, Gorim japang sumitingo ua do'oko nikataha. Unon ua chaange uko kole ra'baenba, an'tangni dring mitap changra gadangchi ra'ange doneaha. 'Sawa Sangra rakgipa, san bigrang dalgipa, pongsik ponggoa bia, anga uko nisogen' ine Aje Gilje Tiraba aganaha.

Uni aganani ja'manon ua Niba Jonjako nikso-bebeaha. Niba Jonja Aje Gilje Tirao singeaha, 'Na'a angni do'mandal doselbalko niksopaama? Maina ia jolon kimil grijok, an'chi bonchang-jok, na'an rasoama?' Aje Gilje Tira 'angade niksoja, cha'aba cha'ja' ine aganchakaha. Na'a ja'mano sandie am'e nikande, indiba da'o nokona jamona gakatbae asongchengkubo ine Aje Gilje

Tira aganaha. Niba Jonja nokona gakatangon, Aje Gilje Tiraba pakman do'de grango dāmdil bijarango am'pokma jagroo asongchina on'-soaha. Niba Jonjaba am'pokma jagroo asonge, maljurio dengdale asongaha. Aje Gijieba song'a jentisniko, kaa nabaksniko, site so'o kamako, bitchi chino man'ako, kaksil do'deko dokpong-ponge, chubitchi we'chipbile salsni walsnina una kanaha. Unon Niba Jonjade chupeke mikgil nome, am'pok jagroo tue tusingaha. Uko nike Aje Gilje an'tang dringtangona de'tomange uko biaptango tuate an'tangba tupasrangaha.

Sireng gisikwatosā, ruram wa'pe salsoa Niba Jonja miksele mikrakahaoa, dring ning'o changra gadango, Aje Gilje Tira baksa tua ine an'tangko nikaha aro jena katna man'jaha. Pring wal sengahaon, dosi doraē kawa kaate dongat kimatsrangaha. Kima dongani adita salni ja'mano ua jiktangni gitokari gitokteng, nachilari mindileng dakako nike ka'sachakaha. Uni gimin segipa Niba Jonja tanorina mindinnina, atmana seginna, jaksan sinchirikna, chinna dorimitna, ripok rikrengsimna, ba'ra gansilchimna, Sangkati Wakmetom, Dimrimbri Palwang a'ding antiona re'angaha. Indake re'angon ua rama bijangehio Rengra me'a Balsa panteko (Salgra) grongaha.

Salgrara Ading Reding Banda nokol Re-jimko rimbite. Achak gisim salbite re'baako

grongaha. Niba Jonja singaha, 'Mosa boninga da'o bachisa re'enga'? 'Noa ma'ako apa boningko grongna graknasa nang'ni nokchi songchinan re'baengachim, mosa' ine Salgra aganchakaha. 'Angade nang'ma nang noko tanorina mindinnina antina a'kangna re'enga. Kima ka-gijade, anti cha'gijade angade re'piljawa. Na'a re'angaibo, nang'ma nang no chua minilko chucheke, waka wakmilko doke song'e chane on'ai-gen, mosa' ine agangrike Niba Jonjade antichi re'angaha. Salgramangba Niba Jonjani nokona re'angaha.

Aje Giljeni nokona napeon namchiktangba chua minilko cheke, waka wakmilko doke song'e rite on'soaha. Uko cha'e ringe pekoa Salgra mikgil nom'e tusina sike nogipa namchiktang Aje Giljeni dring changra turamchi napangpae tueaha. Unon namchiktang Aje Giljeni sokmede tappingjok, japingde chibiljok. Unon Aje Gilje, 'Angade angsenade kawanade maikai agane mesoke on'gnok' ine segipana kenbeaha. Unon mamatang Salgra, bolakal rim'a, najekwa so'a ine agane mesokbo ine skiaha. Indake aganoba bebe ra'jaode, Mama Salgrana dikma de'ani, dikku chanani chiseldape tangsildoenba sokme tappinga japing chibila' ine aganbo. Indake namchiktangna ku'sikie kupatie, mamatang Salgrade songtangchi re'angpilaha.

Niba Jonja antiona re'angon rama jatchio Muni chambunio ja'gitotaha. Unon mikgil nome ua tusijolangaha. Uni indake tusimitingo Misi Biari Katchi Susime ako wene chiko pane rero-robae Niba Jonjani tusiako nikeaha. Uko nike ua uko demesae aganaha. Nangni ja'gitot-gipade Muni chambunisa, bijak regatchi, bita gongchi pokoke piksale ra'bo ine ku'sikie kupatie agane donangaha. Niba Jonja mikseloa, Muni chambuniko pikok piksalenba antiona reangaha.

Niba, Jonjani antiona sokangoa mamanti bosturangko palgipa gatgiparang ku'agana gri, kumesoka gri jrip mitip tusiangtokjok. Niba Jonjade sing'dingnan kajaninan nangjapilaha. Ua chinna dorimitko, jaksan sengkiko, gitokona ripokko, nachilona gananiko aro rokom rokom busturangko chinsomsome koko sike nokchina olangjok.

Nokona sokangoa. Niba Jonja jiktang Aje Giljeni gana ganjolue chinaniko chingope dong-engako nikeaha. 'Mai sasoenga, dingsoenga?' ine segipa uo sing'aha, unon 'Najekwa rime, bolakal so'e sokme tappinga, ja'ping chibila'. ine ua dongatang kawatang (setangna) aganaha. Indiba segipa beberajachim. Pile na segipana agantaiaha, 'Mamana Salgrana dikma de'ani dikku chanani chiseldape tangsildoe sokme tappinga, ja'ping chibila.' Na'a tolnanggija tol'enga,

meja Misian Saljongan, nangkuride, mamatang Rengra me'a Balsa (Salgra) mung dring nape changra gaesa sokme tappinga, ja'ping chibilenga ine angna aganataha. Uko knae jikgipa jrip dongaiaha.

Niba Jonja mosatang Salgrako ka'onange bika gape gro dingna mangsongaha. Do'gisik wala sengna skangan, danang, Niba Jonjade milam jako ra'ari sepi kangsari de'ari Rongdogachol Saljong batraona (Salarani re'baani rama) re-ramsoe timsoaha. Salgrani Rongdogachol Saljon gbatra gita re'baon brian pangpikbaa rongman romtombako niksoon Niba Jonja nichaknan manjae, dongsona pajae grim rongkolchi silang mitapchi nape dongaiaha. Uni indake dongako Misi Biari Katchi Susime nikdikeaha: Niba Jonja, na'a indake dongaiode namjawa, nangni manbagipa Muni chambuniko ra'e rongdogachol Saljong batrao donsoaibo chipusoaiibo ine kupatie kusikie aganaha. Niba Jonjaba Susimeni agana gitan Muni Chambuniko Salgrani ramao chipue donsoaha. Salgraba ra-matangko re'bataion Muni Chambuniko chilna kingna amjae mikgil nome tusiangaijok. Agilsak chigilbo andaljok mitmat, salgisak rangkambe sengjajok chipchap mande maronchi mande agital gamna suna nik'jajok, do ba matba ga'brit ga'kuweke cha'ampana man'jajok.

Indakako Susime nikenba 'Aiao, indake ong'ode a'gilsak salgisakna namjawa aro tangjawa uni gimin Niba Jonja nang'ni mosa boning salgra baksa gitok chikgrike gro namgrike mepalsan cha'rimbo, chi te'san ringrimbo' ine agana-hani gimin Niba Jonja aro Salgra mosasa boningsa gitok chikgrike gro namgrikaha beksano ringrimjok, mepalsan cha'rimjok.

Indakesa a'gilsak chigilbona jasengjok, salgisak rangkambeko niksengjok. Ja'mano Niba Jonja Muni Chambuniko ra'e uko te'rikgrimo ge'e donna ra'angengako do'reng ganggipok chidual nikenba uko rang'san chapake bale katangaha. Do'reng ganggipok chidualba Muni Chambuniko Koasi Ronggitchak a'brio ga'akataha. Uko Menpa Rongdingpa (Chipu Nokma) kon'daptudape nitim'dongtimenga aro do'reng-rangba nokpante jamsirenge dongtim-nitimenga ine A'chikrang aganenga. Ua biapkon Do'reng Nokpante ine mingsing minggamenga. Da'ona kingkingba ua biap Koasi Ronggitchak a'brio dongenga.

Simsakjavde an'tangni man'giminko. gimaata Dal'bea bobil ong'ani a'sel sokoba meligrikaniko dakan kusi ong'grikpilani ong'a.

SILCHIKO MAN·A

Chengoni salrango silchini silko man·kujachim aro uikujachim. Indiba Patang Darepa, Silang Do·chokpa silang ritimdoramo brini chudoramo patang rorota silang tengtengako Chada mande a·pro tinggango, bolkaru kangjango dongmitingo knaenba re·ange, nieoa, Silchima ringro ringro, darema jingjo jingjo dake mikkang nikenga de·ansengengako (an·paka) nikeaha. Indiba uko daksrena aro rusrena changkuja aro uikujachim. Indaken silchi dongjani gimin attean silmangaiengpiti aro karian amangaiengpitichim. Silchian akkaru gita, darean me·gimu gita dakaiengpitichim.

Ja·manosa a·song Nongrengo chiga Nengchibingo a·tip timbori rike, mul gaminchi songenba Guangni Ebangni Nalani Tikania·song salaramchi, chiga mitechakchina jipanga choangako Megam Airipasa man·soenba daksrecheng rusrechenge niaha. Indakesa Daremako Nogitok. Silchimako Nojinjin ine mingaha.

Indakesa silmango silchi sike, atte, gitichi, milam rua, sel·u, aro rokom rokomrangko dake bolma pe·e, wa·ma wange, a·a o·e game su·e cha·aha aro nekrik nokdakbaaha ine agana : aro Megamsa Dikilsa silmang doke pala bota ine aganronga.

DO·OKO MAN·CHENGA

Skangni chasongrango da'o manderangni jilenggipa do'orang aro burungni do'grik do'me-salrangba dongkujachim. Indiba skangni mande gitcam Gongga Gongsas, Kama Kada ming-gipa, salsao, Ildek chibimako na jak chekchambile roengachim, unon Ganggibok Chidual do'rengni bolgisidengo rongma chokdengo balmisi baldoreng a'ning sadotchi sakimbalko balbae cha'nasiengako nikaha. Unon ua rang'san majal cheksichi uko dokpakrike man'rikaha. Uko ua dokdu simchi biksot ja'teo kerongchue ke-rongpange ra'enba chekchambile majal chak-angtaiaha. Unon a'ningni dedrang chiningni su'drang, ja'ku rike, ja'kol sane re'baenba Gongga Gongsani na'tok am'engako grongeaha.

Uamang Gongao, ' Ama bitchiko do'reng Gang-gipok-Chidualni chikbaako balbaako niksomang-ama ' ine sing'eaha. Gongga ' Oe, anga chek-jasichi dekpakrike supakrike man'rikaha. Da'o na'simangna uko on'ode angna maiko on-skagen ' ine sing'aha. ' Na'a chingna ka'sa-chake ama bitchiko on'pilpaode Rangagore inoba, a'kom matrong inoba ritchinade, rang gitcam rikgitcam aro rikgitok inoba rurue tok-tokeba on'ginokchim ' ine a'ningni dedrang chiningni su'drang mol'mole aganaha. ' Angna rang-

ko gamko nangja, indiba na'simangni namnik-paode gisikwatgipa ro'e salgipa Sireng ruramkosa on'paibo' ine Gongga aganaha. Unon a'ningni dedrang chiningni su'drang, 'Aiao, ba dita nanga on'aigen. Da'o na'a ching baksa chingni a'song chiga a'ning-chiningchina re'paibo ine agane Gongako rimangaha. Uamangni songona sokangoa Gongako mande ra'e, birong chane chucheke, wak doke cha'at-ringataha. Unon uamang Gongana gring sni joljasni sireng ruamko on'ataha.

Gongga uarangko ra'e a'gilsak chigilboona ra'dobae Atma antio manderangna paleaha. Palo nangsokgijako Gongga Aritcha Rongbareo gragrue roagtike (nol rike) donaha. Indake donoko bijare janggare maschuri nikenba, a'ako bite danok pue chike cha'aha. Mitamrang noloni bilbrange kate jokaha. Ua kate jokanggipa Sireng ruramrangs burungni do'mesal aro do-grik pil'e da'o jelbra jelsuenga ine agana.

KILKO MAN·A

Skang chasongni salrango manderang kilding rike ba'ra kancha doke ganna chinna chang-

pakujachim. Indakmiting chasongrango mande-rang kratchaanirangoniko (nagande ongaoniko) rakkipana gita me'asarang koksep wendapaia-chim aro me'chikrang bolkong pa'dapai-achim. Ja'mano bigilrangko, bol bijakrangko, te'rik re'su bijakrangko aro rekoksirangko jak-kalbaaha. Uarangni ja'mano matbigilrangko jakkalaha. Chanchikalgipa manderang kering biteni ning'oniko kilding rike nichengoa takkur-ian mitilja aro charanggaan saojachim.

Gonga Gongsa minggipa mande Sibsagar jilaoni re'rorobae A'chik a'songona ma'drang mahariko grongna re'baaha. Ua Ildek chisamjolo an-tangni achak Matgrikko rimbite chichol wate Te'matchi ponggro warioniko chekchambile na'rim na'wakko chokil bandako rim'mitingo uni rimbitgipa Achak Matgrik biari warichiko nione sing'bobochoaaha. Uko nikate Gonga, maiko nike achak Matgrikde chiko nione sing:boboenga ine warini chiningchiko nionatoa kilbolni boksogimgim dakako nikataha. Gonga chisamoniko niwilwaloa, Asro a'drio kilbolma dal-begipao kotip kagimika gita bokdimdim nikaha. 'Ia bibalde mande maronchi, mande a'gitalna dakbalbokko rubalbokko dakna namgenchim. Ua bibaloniko bisringko bikote rikode takkuri mitilgen, charangga saogenchim. Uni gimin ua bolko den'pena supena nangchongmotgen' ine

chanchiaha. Indaken ua Changbal Badaka Nongdimbao Ildek chisamo jamdap rike a'tip dakaha. Ua a'tipo wa'alko dangrue so'enba ko surako so'gitchake bolkotape adita salna dake nioa, mamung namgni ong'jawa ine nikaha. Indakesan dakaiode basak salo be'gen wilgen ine Gongga chanchiaha. Uni gimin anga a'kawe aka-jongchi, bamonchi sojonchi re'ange sandie nina nanggen ine re'ange am'eoara, Kamal Badaka-ko Silkamal Hattiako man'eaha. Ua an'tang baksa uko an'tangni a'tip dakanggipaona rim-baaha. Ua a'tipo mul imbanggiko songe jakkala ruapatko dakatruate, bilsni kari snina king-king den'pe supeaha.

Kilbolma be'nasio wilnasio bachipakna beode wilode nambatani ong'gen ine ua sintiaha. Salaram mitechakchi be'ode darema silchimakon dak jawa rujawaha. Salgrochi be'o wilode dokbal-bok chimbabokkon dakjawaha. Salgipengchi be'ode, kirek na'tok paljawa, atte silmang betjawa-ha. Saliramchi be'ode wilode A'deng aro Kotchu Kotdrong, segri rang'gitik ge'e game cha'pana, kiltuma ka'e kila topa wate Bangalna rorina pale bote cha'pana man'pagen ine agane bilsisni karisni den'pe supemano saliramchi mikkange be'ba wilbaaha.

Indakesa e'ching rengsi palako, kila topa palako nike Rapa-Budalong Kena-Benagongsa

Anti Budalong, Segin-Benagongo palako nike, bree nokona ra'angaha. Ua mandesa takkurio charanggao kilding rikchengeaha ba'ra doke ni-chengaha. Indakesa ba'ra kancharangko man'-bachengaha. A'bengarochi kilbolma be'bae kamberike ga'akeani gimin ua jolna kil nambata aro gobata. Badiaba jolrango cheksirang ga'akbaani gimin mitam jolna kil nambreja aro gobreja ine agana. Da'ona kingking badiaba biaprango kilbolma kururango nikna man'enga. Aro bipang be'baani chinrangko nikenga. Da'o je song dongenga ua songko Badaka ine mingenga. Skango ua biapon Balbaka silkamal dongchake, Gongana rua atteko dake on'ani biap ong'a ine agana.

MIKO MAN·A

Skangni salrangode mi misian dongjachim. Uo chasongo manderang burungni bolja'-dil waja·dil bolni biterang ta'arang ta'jong narot aro gipin rokomrangko cha'esa janggi tangba-engachim.

Miko man·baani an·cheng racha wari nokde nabatbra, samdal noksao Gitinga rania koaoni

komiksuanı go'olko an'chengo soage donaonisa chachengaha. Uara ja'dil su'e kambe cheksi bijak dake dal'roroangaha. Ja'mano ua bolko a'gaona ringat ra'gatna am'oba man'jaha. Ua bolara memadong kitmadongo nangaha. Ja'mano ua bolko bangsi sil, damasil, taurongma kaksi dambe nangdap wedappilaha. Uko Misi-Biari, Katchi Susime nikenba akna dakoa man'jachim A'o donge nioa sakchini man'susu dake nikaiachim. Sakchini akskana dakoa, a'achini man'susu nikaiachim. Maina uara, bangbango a'achiba sakchiba ong'gija rake dongengachim. Susime akna joton ka'beoba man'jachim.

Unasa Susime ka'onange bika gape, okku-angsi ja'pachongsi, balwa enok, mite kongtokko ku'mong nangrime, balmisiko rakate, stil rongmisiko onate, memandong kitmadongko ga'akataha. Susime an'tangde balwana stilna kene grim rong'kolchi nape katngaaha. Indiba nosiksiknomindik (Doamik) de balwa stilna kengija koma ra'e kotok de'e role ra'aha. Balwa stil namano Susimeba kolpana re'baoa donggipjakosa nikaiaha. Ja'mano do'amikoniko bi'sikaoa on'tisa on'ataha. Susime uko mande-rangna on'tiprak sualskae on'aha. Untalsa mi misiko man'bachengaha. Ja'mano bitchribigron ra'grikrike ge'roroange gipangaha. Lau rong-mako, kaksi dambeko Ajongna rorina ra'anga-

ha. Iadakesa daona kingking A'chikrangna lau rorirangna tau ine agana.

WA·ALKO MAN·A

Chengoni chasongni salrangode wa·alko man·-ani cholrangkon uipajachim. Uni giminan song·e-rite cha·panaba uijachim. Jeko jako cha·oba gitang cha·aiachim. Be·en bitin man·paoba matburungrang gita gittang cha·aiachim. Walrangoba grim rong·kolrangosa tutokaiachim.

Skangni manderangde salko Rengra-mea, Balsa Te·rak aro walko Sre tonggitchak, Gitok warikkak ine mingachim, Grini tikknima, ma·jinma, ma·anti sakantiko, Okro chubandako aro a·ani rikitko, chioni premko ba·gipa chi·gipa ong·achim. Rengra mea, Balsa Te·rak (sal) ko baon ja·ping chibila aro sokme tappingako man·achim. Uni ja·mano Sre tonggitchak Gitok warikkak (wa·al) bataion janggi gimajok jama nasijok (sisrangaha.) Uni gimin mahari ge·antigimik tom·dake mela saldongtokaha. Ba·gipa chi·pa matangko be·en gitang cha·gipa, an·chigitang ringgipa sikalsa kamalsa ine wa·alko sae ingrime nokoni katangchina a·riktokaha. Da·nang

Sre tonggitchakba kratchae jaksi chike, 'Oe beben, amara angko ba'e chiesa janggi siaijok, jama gima'a'ijok, angni jongska adatangrang aro ma'a norang baksa dongrim cha'rimpana kraja nitojaha' ine agane a'ning chiningchina katangaha. Ua silangmako patangmako kabesal ka'gimale (ma'a no) dake dongaha.

Bang'a salrang re'angani ja'mano Susimema Sangkildoma siaha. Uko so'on mangone galna dako'a wa'alko man'tokjaha. Uni gimin wa'alko rimepilchina Mere Wale, Matcholchot (matchak) ko a'ning chiningchina watataha. Uamangba a'ning chiningchina re'ange wa'alona sokangaha. Susimemade sijok, uko so'e galna am'on wa'alko man'jani gimin nang'ko rimepilchina chingko watataha, ine uamang aganaha. Indiba Sre tonggitchak (wa'al) aganaha, 'Angade kratchajok, rasong onjok, repilang dopilangjawaha. Indiba na'simang bilchamo so'e ra'angbo, ine agane bilchamo so'e on'ataha. Uamang bilchamko kimeo kaenba, a'ning chiningoni re'bamitingo chio sim'choma gita dakenba wa'ala siaha. Uamang wa'alko man'gija re'bapilaha. Indiba uamangk'on Sre tonggitchakkon rimba pilchongmotna nanga ine watattaiaha. Uamangba re'angtaie wa'alko re'pilchina mol'mol-beaha. 'Angade re'piljachongmotjok, indiba na'simang angko man'na sikchongmotode wal-

du ra'aibo, rongtot totaibo, kingkang salaibo ;
angade mikkang rongrong bimang chongchong-
de re'angjawaha ', ine agane watatpilaha. Ua-
mang re'bapile pilak dakna nanggnirangko tale
agane on'caha. Ua gita wadu ra'e kingkang
sale nioa wa'alko man'bebeaha. Ua wa'alchina
Susimemako so'on galonaha. Unonisa wa'alko
man'bachengaha ine aganaha, aro indakesa
waldu ra'o kingkang salo aro ro'ong toto
da'ona kingking wa'alko man'enga.

Mese wale aro Matcholchotara, wa'al ra'-
bamitingo kimilrangko aro ki'merangko kam-
prakesa da'ona kingking uamangni deritchu
su'ritchurangba bimang aro ki'me gitchaka
ine aganani gngang. Basakoba basakoba wa'al
ka'onangode chiningoni aro a'bbrirangoni wa'al
ong'katbae, a'gilsakna chigilbona mesokronga.
Ukon Wa'alni A'bri (Volcano) minga.

SAL ARO JAJONG

Sal aro Jajongni ma'gipako Asima Ding-
sima mingachim. Uno depante saksa aro
de'mechik saksa dongachim. Salni bimungko
Rengra Balsa aro Jani bimungko Bire Jite ine

mingachim. Skangode Jajonga Salna bate ching'bata aro nitobatachim. Salara Jajongni jonggipa ong'achim. Salna bate Jajong nito-batani gimin uamang pangnan miknenggrikani dong'achim. Indaken bang'a salon ma'a paa dongjaode uamang jegrik dakgrikrongachim. Salsao magipani a'bachu re'angmitingo, abisa chonbegipa kamni gimin ka'onanggrike jegrikaha. Sal ka'onang'e a'dubekko ra'e abitung Jajongko mikkango godape kataha. Jajongde miksu jaksugija ma'gipana mesoke agansona donsoaha. Jajongni mikkang samsade rankrappilaha. Atamo ma'gipani nokona re'baahaon, Jajong Salni daka kamrangko mesoke ma'gipana agansoaha. Indiba ma'gipa knachakgija batesa miksu jaksusogija dongsoahani gimin goka jari ine de'mechik Jajongko sae manengbeaha. Batesa ma'gipa Jajongko nangni mikkango donggipa a'dubek pangnan dongkamchina aro nitoani aro chinganiko komiatchina ine sao on'aha. Untalsa da'ona kingkingan jajongo a'dubekni chinko nikna man'enga,a ro Salara a'bitang Jajongna bate rongching-batskaaha.

Jegrikani aro miknenggrike daka kamranga bang'a namgijarangko ong'atna man'na.

SUSIME

Susimeara a'gilsako donggiparangna aro manderangna nam'arango aro namgijarangko patigipa, sualgipa ra'rongipa ong a. Ua manderangni jakora, jakkora, mikgri kugri, kala nagok aro gipin gipin rok rogirangko namatna bil man'gipa mite ong'a. Uara manderangko rura-gipa aro dakmajona changbegipaba ong'a. Uni gimin uko indake aganronga, ' Malamgipa do-kime, Ruragipa Susime '. Uni gimin uko kusi ong'atna gita wak, do'o dogeprangchi chubitchiko on'e rokom rokom katarangchi mitele agane kritronga.

Uandake manderangba saksa sakgipinna tol'rurae on gipako ' Malamgipa do-kime, Ruragipa Susime ' ine aganronga.



ASKIRANG

Skang chasongni aro da'oba A'chikrang sal, ja aro askirangko bil man'gipa miterang ong'a ine bebe ra'enga Uamang manderangna nama aro nam'gijarangko on'na bil man'giparang ong'a. Bils karirangkoba namatna aro namgija ong'atna

man'a ine bebera'a. Uni gimin uamangko ka'onangatgija, kusi ong'ate namgnirangko patipachina ine wak, do'bok, do'o matchu aro do'geprangchi a'sel ong'ani kri kritronga.

Askirangko A'chikrang Noringro Nojingjo ine minga. A'chikrang askirangoni mongsongbatgipa rokom chibriko dal'nikbata mingsingbata. Uamangni bi'mungrang aro kamrangkoba dingtang dingtang agananirang dong'a. Jajongni ma'gipako Norekbal Norekdim aro mingipin Asima Dingsima ineba minga.

Susimeni ma'gipa Jajongni siako so'on galon-miting salrango, askiranga una dingtang dingtang kamrangko ka'e dakchakaniko on'beahani gimin, Susime uamangko gisik ra'anina salgio donaha aro uamangko nikenga.

Askirangni bi'mungrang aro uamangni kamrang, Mangripe Aski, uara Susimeni ma'gipani manggisiko ganchiona so'na ripe-angenga.

Mirontek Aski, uara sigipana mangtugiparangna cha'china don'gipa merongni kok ba rongtek ong'a.

Do'sadil Aski uara sigipako namgipa bi'apona re'dilangchina ine do jasi ka'gipa ong'a.

Chapchore—Nonje Aski, uara a'bisa sakgni. namnambegipa ganding chindingko gane chine siaona re'bapagiparang ong'a. Susime an'tangni ma'ani siaona rebapaani gimin kusi ong'beaha. Na·simang angni ma'ani siani salo ang baksa duk suk chakrimpagiparang ong'ani gimin, pang-na jolnan chin ong'china aro salgio damsang roamgiparang ong'china ine patie aganaha.

Jatokani (goldik) Aski, ua Susime ma'gipani rama re'anio rabbitgipa goldik ong'a. Susime ma'gipako gisik ra'na gita ripinge donaha. Ukon Jajong Goldik ine agana.

Do'sutot ba Do'sutat Aski, uara Susimeni ma'gipako ganchio donmitingo do'bipa manggniko do'jasi ka'gipa ong'a. Ma'gipako so'mitingo matchu chalang manggniko dakgrikatani pal ua do'bipa manggnikosa dakgrikatskaaha. Ukosa do'sutot minga.

Aski Do'me, sigipako am'o pujumitingo do·bipani kimerangko (do·merangko) skopango dongipa ong'a. Uko gisik ra'na salgio donaha. Uko nikrongja, nikani bilsa ong'osa nikaia. Aski do'me naode marang sterang ong'a Bilsa karirang namja akal karap ong'a, sabisi sakanchi soka ine bebera'a.

Menggo Ripe Aski, kritram biapona wakko ripeangengako bi'sarang nikrikenba, an'chingba

menggochi krita dakpana ine ku-monge menggoko ka'e ripeangengako Susime nikenba kusi ong-beaha, aro uko gisik ra'na ine salgio donaha.

Wak Ripe Aski, uara Susimeni ma'ani siao mangtugiparangna bi'jak song'e on'pana ine ripebagipa ong'a.

Mangganchi Aski rongbri, uara ganchi rikna kitikbrio songgipa krongrang ong'a.

Mangripe Aski ronggitam, uara sigipako ganchiona ripebaenga, jatchio donggipara sigipa, sepangbate ripegipa chra dal'batgipa chel'kalgipara gipin ong'a.

Matma Ja'kol Aski, sigipana den'atpana ine song chel'ao donggipa ma'drangrang matmako moe re-baengachim. Sigipani noko dama dachi rang kram doke, bangsi adil sike, grip grip, grai grai doktokengachim. Matma uko knae kenenba re'jaha. Ki-sangchi an'pile katnasa dakaiaha. Uni gimin matma mobagiparang doka damako dontongkuchina beng'e aganataha. Indiba batesa doka damanirangko bangbate doktokbo inesa knasrettoke, bangbate doksotokaha. Unoa matma an'pile ki sangchina katpilangaha. Indakesa matmani re'baani aro re'angpilani ja'kolrangko nikenga.

Pringprang Aski, uara a'gilsako donggiparangni walo tusigiparangko walseng'aha, mik-

raktokboaha ine do·bipani gisikanichi u·iatrongenga ine agana.

Atamprang Aski, a·gilsako donggipa janggi tanggiparangko aro manderangko na·simangni jilanirangko sandie chiptok katokbo aro pilak tusina nanggiparang tusiani aro nengtakani somoi ong·aha ine mesokgipa ong·a.

Do·sadil ba Do·sadipil Aski, uara Susimeni ma·gipani do·bima bi·satangko cha·dil rodileng-giparang ong·a.

Aski ga·akgipa, Do·sadil Mingitir minggipa aski skango a·gilsak chigilboni me·tra namgipako mikchae namnike jik kimachim aro adita bilsirangna dongrimaha. Ja·mano aski skako nike mikchaenba, a·gilsako dongchenggipa jikgipako gale seke kimaha aro salgion dongkamaha. Indiba a·gilsakni jikgipakoba ua gualnade man·jachim. Uni giminsa ua gisep gisep a·gilsakona jikgitchamko grongna re·barongenga. Ukosa manderang aski ga·aka ine agana.

Indake agananirang aro bebe ra·anirang A·chik-rango bang·bea. Uarangko see rakkiani dong-pajaoba, chasongni chasongna ku·ritingchi agan-roroe rakkibaenga.

SALJONG

Saljong a'gilsako donggipa manderangna janggi tanggiparangna aro gipin gipinrangna patigipa, sualgipa ra'rongipa mite dal'gipa ong'achim. Saljong ua kamrangko dakchina an'tangni pal Salko ge'etskaaha. Ua mi misirang a'ao chagipa sam bolrangko chaatgipa, dal'atgipa aro minatgipa ong'a. A'gilsakna namgnirangko aro namgijarangko ong'atna bil man'gipa ong'achim. Uni ka'sachakjaode a'gilsak mamung namgnikon man'jawachim, uni ka'sachakani giminsa a'gilsak namgnirangko man'tokpaenga ine A'chikrang bebera'a.

Uni giminsa bilsio changprak mi misirangko aktokmano, uko mitelpilani pal gita, cha'e ringe, matchu wak doke, mitena Saljongna on'na nang-anirangko on'e manianirangko dakrongenga. Ua manianikon 'Wangala' minga.

Indiba wangalna skang a'batangtango sam-basitoke, kimilrangko pa'e chubitchiko rudape ma'manti katarangko minge kritchenga, uni ja-manosa songona re'batoke song gimikan kramrang doke, dama dachi kee, bangsi adil sike, matchu charako doke, mi cha'e chu ringe nokmani a'tilao (sara) me'apa me'chikma, pante me'tra (nomil) bi'sa desa kusi ong'e chrok mesae an'sengtoka. Nokmani noko cha'chat so'ani

ja'mano sulsul nokantichi re'roroe chroke cha-tok ringtoka. Ua mitekon Teng'sugipa—Teng-totgipa Salgira (Salgra) aroba Rengra-Balsa ineba minga.

Wangalani salon me'apa jinma pakruegrike doro ring'a. Pante me'trarangba namnik atangtangmung ajie (ring'e) kusi ong'grikaniko dakronga. Unsalon bolgrorango, bilbangrango, pakmarango aro kokrangoba wanti pura tok-toka. Aro nomil pante an'tangtangna basee ra'grika.

GOERA

Goera minggipara bilakbegipa aro ta-rak-begipa mite saksa ong'a ine bebe ra'a. Ua delipe ba riprape ba ileripani ja'mano gam'prete kim-pretronga. Ua bolrangko, manderangko aro matburungrangkoba goe nisiatronga. Ukon goe-ra goa ine aganronga. Mande ru'ute saaniko man'ode, an'sengani aro bilakataniko man'na ine Goerako minge, wak aro do'ochi kritronga. Bol ba jakoba goako nikode, an'tangtangni nok-rangko gojachina ine bolrangni ja'pango sam-basie wak do'o aro do'gepchi kritronga. Goera

pelgap dakgipa ro'ongchisa goronga ine agana. Ukon "Goera rong'pra" minga. Ua Goera rong'-prara samna nama ine manderang uko nikode ra'e ripinge donronga.

KALKAME

Kalkameara, Goerani adatang ong'a Uara a'gilsakni manderangko simsake rakkienggipa ong'a. Matburungrang, waku-wareng. snare dambini, chipu-mapu, mongma-matcha, mapil, rokrogi, bisi-bijong, kasi-kawak aro gipin gipin a'sel ong'anirangoniko rakkigipa ong'a. Ua-rangoniko rakkie jokatengani gimin una namanirangko dakskana nanga. Uni gimin manderang a'songtang chigatangoniko ua namgija nirangko a'rikna gita ro'ong doko songni sepango songe, bilsio changprak do'bok aro do'orangchi rokom rokom agane an'chi aro kimilko rong do songani kosako nonge, kimil pa'e kalkame kritronga. Ukon a'song tata ba a'song roka ine minga. A'chikrang uko dakna gualja.

NAWANG

Nawangara (Sikal) sianggmin manderangni jama janggirangni me'mang a'songona re'ani cholbi-brao donge minoksoronga. Uni gimin Nawangoni jokangpachina ine sianggipa manderangna sisa, ripok aro maiba maiba bosturangko galchap-atronga. Nawangna jugina on'angbo goangbo ine minge grapronga. Maiba bosturangko on'angode Nawang chikgija watata ine bebera'a.

Ua Nawang sikalara tangenggipa manderangni jama janggirangko aro okningo dongenggipa bi'sarangkoba nisironga. Basakoba mandeni aro matburungni bimango napeba nisianiko dakronga. Basakoba ok saata, ok re'ata, mariki saata, wakgalata ine bebera'a.

Basakobara manderangni samitingoba aro bi'sa desani tusimitingoba re'bae dongtimronga. Uni gimin uamangni skopango atte silchirangko dape donronga; silchidarenade kena ine bebera'e indake dakronga.

Sikal Nawangoni jokna man'na gita silchidarerangko ra'esa songre songbatna nanga. Indake silchidare gnang songre songbatoba cholrangko niroke ra'seke galenba nisiataniko dakronga. Ua rokom rokom daknaba man'a ine aganronga.

A·chikrang rokom rokom agane bebe ra'e kenronga.

A·GILSAKKO DAKA

A·chikrangba a·gilsak chigilboko ba·gipa chi·gipa donga ine bebe ra'ani aro agananirangba donga. Chengoni salrangode a·gilsakara porongrong dake bangbang dakaiachim. Uni kosakoa chirarasa gape dongaiachim. Chini kosakoa andalgimikaiachim, salba jajongba dongkujachim.

Dakgipa-Rugipa, Tatara-Rabuga me·chiko atchiatna ine a·ako ba·china Nostu-Nopantuko watataha. Nostu-Nopantu anga maikai a·ako ba·na chi·na man·gen, uko chanchie nion uijaha. Maina dongchaknan biapan dongjachim. Nostu Nopantu skang chini kosako guangni sringe dongengao dongechengaha. Tatara-Rabuga uko nike ka'sachakenba adita an·chengko on·aha. Uno dongchake Nostu a·ako ba·na man·jaengachim, maina an·chengara mangrakjachim.

Uni gimin Nostu chiningchini a·steko ra·echina ang·kerongko ge·etaha. Indiba ang·kerong chi tu·beani gimin re·bapilaiaha. Aroba Nostu Chipong-Nokma Balpong-Gitel minggipa ang·ke chongipako, chiningchini a·ako ra·echina

watatskaaha ; Uaba chinan kenjagoke re·bapilai-aha. Ja·mano Nostu Chingching-Barching ming-gipako (ki·chil) a·ako ra·echina watattaiaha, ua chiningchina re·ange adita a·ako romrome ra·dobae Nostu-Nopantuna on·eaha. Indakesa Nostu a·ako oko change kee, sal sokoa a·ako ba·aha.

Uni ba·gimin a·akon, Mane Pilte (a·gilsak) ine bimung mingaha. A·ani bimang rong dotma gita totgni dakachim. Dal·gipakoara Major aro chongipako Dinjar mingachim. Indiba uaranga a·an rae ka·kuja, silang silchi kakuja ; a·anma ringro ringro, chianma jingjo jingjo dakaeng-pitichim. Indake dakako nike Nostu dakgipa rugipa Tatara-Rabugao namatchina mol·mola-ha. Tatara-Rabuga ka·sachake salgio Sal aro Jajongko donaha. Unosa sala taktak rakatjok, balwa hoho balatjok. Silang silchi sikkabajok, a·a ra·e kabajok. Indakesa a·aba mangrakkabajok aro ro·ongba mangrakaha.

Tatara-Rabuga a·gilsakna seng·kiko, sko koping-nara aramko, kninara prap, giting, bolong, bolsal sawe, re, re·jak aro gipin gipinrangko on·aha. Gana chinani palara kasi, tilu, gong, am·pang, samin, samsi aro rokom rokom a·ao chagiparangko on·aha.

Tatara-Rabuga a·gilsako donggipa matburung-rangkoba dakaha. Uarangna jatprakprakni dakgni

kamrangkoba dake jelbrajelsuachina aganaha. Walrango tusidape gualrongjachina gita mikrakatchina ba de mesatrongchina, sireng ruram, do-mesal aro huroko donaha. Uni giminsa sireng ruram aro do-mesal seng'na skang skang gisikachi uiatronga. Huroara salchugrao mikoronga. Una agreba do-orang, matburungrang, guk jo-ongrang aro rokom rokom ma-malrang bilsa aro karina krae kam ka-tokchina agane dontokaha. Indakesa da-ona kingking pilak ma-malrangan an-tangtangni dakgnirangko gualgija daktokenga.

Chio donggipa janggi tanggipa rokom rokom ma-malrangkoba dakaha. Indiba beng-blokk mikka wanasiengako a-gilsakna uiatchina donaha. Uni gimin'sa mikka wana sepangbaon beng-blokrang mikoachi uiatronga. Beng-blok mikoode mikka wana sepangaha ine aganronga.

Chiara a-ningosa gape dongaiachim. Indiba a'ani kosakode chian dongpajachim. Uko nike 'Tatara-Rabuga chimikrang, chiringrang, chibimarang ong'kate jokchina Nore-Chire, Kirme Bokreko (mikkani ma'a) ge-etaha. Indakesa chimik, chiring aro chibima ong'kataha. Indiba a-gilsakna mikka wabanasiengjok ine uiatso-rongchina del-ipe, riprape kimprete gam-atgipako salgio donaha. Indakesa mikka wana skang riprape, del-ipe kimpretrongenga ine A-chikrang bebera'a.

MANDEKO DAKA.

Salaram mitechakni badiaba biap damsao Ami-
tong-Asiljong minggipa mande measkako dakaha.
Ja'mano Sane-Mune minggipa me'chik-ko dakaha.
Uamangani dedrangko Gancheng aro Dujong
ine mingachim. Uamangan Noro man-deni pagit-
chamrang aro A'chikrangniba pagit-chamrang
ong'achim ine agana.

A·GAMCHENGA.

A·gilsako dongchenggipa manderangna cha-
ani mi misian dongkujachim, aro uarangko man-
ani cholarngkoba uikujachim. Indakmiting sal-
rango uamang bol bite, wa·bite, bolja·dil,
wa·jadilrangkosa cha·e janggi tangpaaha. Game
su·e cha·nan uikujachim. Bang·a bilsirangni ja-
mano Bone-Ja·sku (Bonepa) aro uni jikgipa Jane-
Gando minggipa jiksesasa a·ako game cha-
chengaha. Uamang rong·totma dal·gipan bolia
wa·marangko pe·cheng wang·chengenba, wa·cheng
rame so·aha, aro ua biapo misiko sat·aha. Misi
minahaon uko akoara rong·totmako wilwile akaion
misi kok dokko man·ana, aro uabiapkon da·ona
kingkingba Misi Kokdok A·bri mingenga. A·ba
rango ge·china akaru, te·e ba·ring, jal·ik aro gipin

gipin bitchilrangkoba Tatara-Rabuga on'aha. Untal talsa a'ba game cha'aniko d'kbaroroaha. Bone Ja' skuni chuara chadengo ja'skuona sokaiachim, uni gimin uko Bone-Ja 'sku ba ja'skuona chuaigipa ba Bonepa ine minga.

BISI—BIJONG

Tatara-Rabuga a'ako ba'china Nostu-No-pan-tuko aro aski jonariko ba'china Brara aro uni jikgipa Doniko watataha. Indiba Brara uko dakgija jikburung baksa kusi ong'e roarisa dongaia-chim. Uamangni roengako jikgipa Dogni nikenba ka'onangbeaha. Uamangko maiba rokomchi sasti on'na mangsongaha. Ua tik-kli te'sako ra'e uni ning'o bisi bijong, pari duri, kasi kawak aro gipin gipin rok rogirangko chipenba uko an'tangni segipana on'e aganaha, "Na'a iako ra'e a'gilsak aro salgisako roam-rorobo." Uni segipa an'tangni jikburungko rimbite a'gilsak aro salgisako roam-roroaha. Indiba Brarani jikgipa bakan bisi bijong nape pari dakaha. Uko namatna joton ka'oba nampilatna man'jaha.

Uni gimin an'tangni jikgipa Dognionan jiksesan re'ange, mikkangchi chinga ge'etgimin

kamarangko dakgnok, ka'sapae bisi bijong cha-
ako namatpabo ine kema bi'aha.

Jikgipa Dogni kema ka'e namatpilaha. Se-
gipa Braraba salgio askirangko dake donaha.
Indiba bisi bijong, rok rogirangkosa a'gilsako
donggipa manderang man'skae saanirangko man'-
skaenga ine agana.

SAL ARO JAJONGNI KAM

A'gilsak dalgapani gimin Sal aro Jajong an-
tangtangin ding'a aro ka'sinako a'gilsakni paktang-
tangna on'sokna man'jaani gimin, a'gil-sakni
kosakchi aro paksachi re'rurae, a'sakao donggipa-
rang aro pil'paksao donggiparangna ding'ako aro
ka'sinako man'pachina ine dak-gipa rugipa Tatara-
Rabuga Sal aro Jajongko agane ge'etaha. Uni
giminsa Sal salgimiko salgiko re'dule, a'gilsakna
seng'ako aro ding'ako on'enga. Salgiko re'dula
bon'mano a'ning gita napange, paksachiba re-
dule, uchi donggipa-rangna seng'aniko aro ding.
aniko on'enga. Uagitan Jajongba apsan Sal gita
dakpaenga ine bebera'a.

MIKKA DEL·IP

Skangni chasongo A'chikrang indake agan-ronga : Goera an·tangni mil'amko de'e gisep gisep rasong dake salgio salgio donge, ripraper a'gilsakna mesokatenga. Goeraba skangode a'gilsakon dongasakon dongachim. Uara bilakbegipa ong'a-chim. A'gilsako unbaksa dakgrikna amgipa dongjachim. Indiba ua ka'sachakgipa ong'achim.

Goera a'bri gita dal'gipa wakmatteko so'otaha. Ua wakmatteni be'eno wa'ge chong-sni chaa aro chiring dilsni jokpilachim. Ua wakmattea manderangko aro matburungrangko minok: rongachim; uko dakgrike so'otna amgipa dongjachim. Goera manderangna ka'sachake, ro'ongrangko rong'gate neng'bee dakgrike an·tangni mil'amchi den'e so'otaha. Wakmatteko so'otan ja'manosa an·tangni mil'amko ra'e a'gilsakoni salgisak rangkambeona re'ange dongkameaha.

Indakesa bilsanti gisep gisep rasong chae, kusi ong'e an·tangni mil'amko de'e riprap riprap dakate a'gilsakna mesokatranga. Jensalo Goera mainaba ka'onanga, unon ua mil'am ripraper chrikprete jeko man'a ukon geo roa. Ukon goera goa ine agana.

A·GILSAK DALGAPA.

A'chikrang a'gilsakni be'en bimangko dalgapgap daka ine bebe ra'a. Uni gimin a'gilsakni ki'tik ge'bri gnang. Ua ki'tik ge'prakprako budu dingprakprakchi kaenba bangbango kadingdea gita rakate dongenga. Ua ki'tikprakko nitim-dongtimchina mande sakprakko donachim, uamang sakbrian kanarang ong'achim. Uamang sakprakan wa'jol jolprak ra'toke doksipsipe wal sal nitimengachim. Basakoba basakoba mat aro meserang budurangko tinsotna am'rongachim.

Basakoba basakoba nitimgiparang neng'a amjae tusidimuronga. Indakmitingon mat aro meserang badiaba ki'tikni buduko tinsota, unon a'gilsak pakwake il'engako man'a. Indakesa a'gilsak ringrenge mojingjengatako man'a. Aro ukosa A'chikrang 'Banggria' ine agana.

Minggipin aganani gnang. A'gilsak dalgapgap dakako budu dingbrichi kae aro kadingdee bangbango rakate donenga. Uko gisep gisep meserang katurae roronga, uni a'selsa a'gilsakara il'engpil'eng dake moatako man'enga. Aro indakesa banggrienga ine agana. Bang-ni orto bangbangoni, griani orto ga'aka, bangbangoni ga'aka.

NAWANG MINOKA

Sal aro Jajongko gisep gisep Nawang minokani gimin A'chikrangni bebe ra'e aganani indake ong'a : Basakoba basakoba Sal aro Jajongko simgipa bimangchi ka'sne ka'sne pindaproanga. Salko pindapode, Salko Nawang minoka, aro, aro Jajongko pindapode, Jajongko Nawang minoka ine aganronga.

Basakoba basakoba Nawang, Sal aro Jajongni ramao dongsoe Salko ba Jajongko minokronga. Minokangengon dama dachi doke, singga adil sike, jinma hohoe, a'boke chrike, a'rikna nanga. Unode Nawang kene an'tangni minokgipa Sal ba Jajongko ku'galpile watronga ine bebe ra'a Indaken Sal ba Jajongko Nawang minokode watchina dakronga. Nawang minokon talao chirue niode rongtale nikbata.

MIKKA BALWAKO A RIKA

Chasong gitchamni A'chik pagitchamrang mikka balwa aro stil ga'ake ta'arakbanasiode, nokni me'asarang an'tangtangni nok jamna ken-

chaksoenba, mil'am ba atteko saraona ra'ongkat-
bae goripripe,

Chinalsa gita balangbo.

A'paksachi jokangbo ;

A'gitakko nie, chikareko bate

Balangbo, jokangbo wae,

ine chrike a'riksoronga. Indake dakode uarang-
ba mania ine bebe ra'e dakronga.

SALGRUA

A'chik a'songni bang'a Nokmarangni a'king-
rangni ning'o Salgruani (Wachi krita ba wachi
tata)biaprang donga. Indiba badiaba biaprangode
dongpaja. Indiba Wachi Tatna nang-ode bi-
grike am'grike dakronga. Ua Wachi Tatna
gita ramram chiringoniko ra'e dakna man'ja.
Indiba je biapo ba a'doko wachi tatani chi donga,
uanoni chikosa ra'e tatronga. Ua biap-ko raken
mania. Ua biapni wa'a bolrangko den'malja.
A'barangba o'na man'ja aro o'rongja. Saoba
unoni wa'a bolrangko den'ode ba a'ba o'ode dai
gamna nanga. Ua daiara indake ong'a Je mandeni-
ba ong'bo, uni wak ba matchuko su'e songgim-
ikan cha'ronga. Uarangni dam je-gita ong'oba
wa'a bol den'gipa ba a 'ba o'gipa mandean uko
gamna nangaia.

Wachi Krita, Wachi Tata, Wachi Ra'gata, Salpang Sima aro Salgrua iarangni mangsonga apsan ong'aia, maina uaranko joltangtango dingtang dingtang indake bimung minganisan ong'a'a. Iako maniram biapara songoni adita chel'gipa biapo rong dotma dal'gipani ja'pango ong'rongbata

Maniani sal, je bilsio mikkani nokgipa ba Mite mainaba kao'nangenba, mikka waani somoi ong'ahaoba watgija sal rakpretpretata, aro balwa raksimsimate, a'breng aro a'dalrango mi ge'manjok ba misi satmanjok ong'oba indiba mikkaan wajaode, indaka somoion salgruronga. Uko daknasiode me'asa sakprakan lau te'prak ba kabe ge'prak ra'e uarango wachini chiko brae, Wachi Tatram biapona re'angtoka. Tua-ra (kamal) ua biapo sambasie, mikkani miteo ma'manti kattarangchi agane mlo.mola. Uano do'bokko so'ote, uni an'chirangchi rong dotmao satkikie nongronga. Indake kamalni dakmitingo dama dachi, rang kram dokmitingo ruan ba dikkongo chiko rue kamalko jippongpongda'e, an'tangtangni ra'anggipa chirangchi kamalko rudapdaptoka. Aro saksa sakgipinko chi rudap-grike rim'grike dakgrikronga. Indake dakakon Salgrua, Salpang Sima, Wachi Krita Wachi Tata aro Wachi Rakata minga. Indake dakode mikka waa ine bebe ra'e daktokronga.

MI MISKIO OKAMANI

Chengoni A'chik ma'gitcham pagitcham-rang aro da'ororoni chasongoba mi misiko aro gipin-rangko patigipa ra'kongipa, ka'sachakgipa mite donga ine bebe ra'ronga. Uko namnikatna aro kusi ongratna nanga ine bebe ra'e, do'orang aro do'chirangchi krite okamronga. Uko chasongni chasongna dakrongbaenga. A'dalo aro a'brenge mi, misi satna ge'na skang uko dakronga. Uko ckamani :

Oh, Oh, Songdu ja'rimni.
Mikka simdimni,
Gakathabo gadobabo ;
Rama baksojok,
Jangrang kasojok,
Grong miksku,
Nachil ruansku
Arengmana Sandomana,
Gakata gita gadoa gita
Bolsil ja'pango,
Gram chiringo,
Ja'chik dem'babo,
Nachil songbabo,
Puwae srang.

DO·AMEK

Chengode Do·amekko (Mewek) Nokol Bangge Rori—Jage mingachim. Changsao indake ong-aha : A'an Boko Bajar, Chime Ragu Patal a'song Silwechi, Chiga Rongdo·gachi minggipa a'songo, A'ning Munema Chining Sanema, Balnang Dusrang, uni segipako Arimil Dingrimil Dirimil Changrimil ine mingachim, mingbagimin a'song-rango songdongachamitingo nokkol Bangge-Rori-Jage minggipara A'ning-Munema Chining-Sanema nokkol itako man'engachim.

Salsao indake ong'aha; Misi-Salaram Saljong-Nimarota minggipara Ailnang-Adil-kang Te'mat-chi—Ponggro, Chinamgija-Rongsolbra minggipa a'song chigao songdongaha. Ua biapo dongmitingo ua a'ningchina aro sakchina songre-songbatrongachim. Changsao ua a'ning mitap chining grango donggipa nogipa namchitangko grongna re'angenga-chim. Ua salon nokkol Bangge-Rori-Jagearea mewek mewek (mi song'so bo, misong'bo) sok-gipa sokbaengjok, nagipa nabaengjok ine Munema-Sanemana agan-soaha.

Unon A'ning -Munema Chining-Sane-ma aro uni segipa Balnang-Dusrang sawa nokkol gaptek soka soknakengade ine nona ma'na pa'e saiso-engachim Saisoa ku'toatkujaon mamatang Misi-

Salmara Saljong-Ni-marotaba kotip sona pat-rangrang kae gando ripok 'wachokchok gane goldik tokanie, jaksil manggol gane re-bamitingo namchiktang aro mosatangni saiako knadikeaha. Unon mamatang, "Ha, na-si-mangde sakosa saisoenga manengsoenga," ine sing'aha Unon Munema—Sanemara mamatangna nokkol Banggeko tol'rurae on'gipa ong'a ine agansoaha. "Aiao indake tol'rurae aganjoode namjawake, uandakgipakode angchina watat-bo, ine mamatang aganaha. Unigimin Munema-Sanema nokkol Banggeko mamatang baksa watataha. Salma-Nimarotaba nokkol Banggeko a'songtang chigatang Ailnang-Adilkang, Te-matchi Ponggro, Chinamgija-Rong-solbraona rimbaaha.

Indakesa a'gilsak chilgibona sokbae songdongpana nangaha. Unon Bangge-Rori-Jageko A'nik-Kingse-Pure-Ranche ine bimung mingskaaha. Bang'a sal dongani ja'manoindake ong'aha; Salgra-Rengra, Songdura Balsra, Aijong-Reding Banda minggipa Salmechri Mesot A'dingo songdongachim. Uara kachotcheng mandal bale, rikgitok jare one gane man'e dange cha'engachim. Salsao Salgra namchik-tang Aje Me'chik Gilje-Tirak grongan ine re'baengachim. Unomiting chachaon Anik-Kingse Pure-Rancheba Salgrana sang mewek, mewek (mi song'bo, mi song'bo) ine

Aje Giljena soka sokbaengjok, nagipa nabaengjok ine agansotaiaha. Unon Aje-Giljeba "Sawa nokkol soka sok-baenga" ine ma'na nona pa'e saesomitingo, Salgra-Rengra Songdura Balsaknadikeaha. Unon mamatang Aje-Giljeko "Aiao, na'ade sakosa ma'na nona pa'e saesoengasai," ine sing'eaha.

Unon Aje-Gilje mamatang Salgrana Anik-Kingse Pure-Ranchekosa "Nang'onade soka sokbaengjok, nagipa nabaengjok mewek mewek ine tol'e aganani gimin saisoenga angade" ine aganaha. Unasa Salgra-Rengra Anik-Kingse Pure Pure-Rancheko "Da'ontal na'ara a'gilsak chigilboo dongenggipa manderangna tol'rurae tl'ojuae, be'en maronchi mande a'gitalrangna soka sokgniko na-nagniko re'roroe aganjojogipa ong'srangbo na'ara" ine agane donangaha.

Indakesa da'ona kingking manderanga do'amekni mewek, mewek mi (song'bo, mi song'bo) ine bilwenwene bildingdinge mikooode sokgipa sokbanasienga ine aganronga. "Na'a mewek tol'ode do'reng chike cha'bowae nang'ko" ine me'chikrang saironga. Mewek bilwenwene bildapdape mikooode sokgipa sokbebea ba basakobara gipinchi maiba a'sel ong'gnikoba mesoksoa ine A'chikrang bebera'ronga. Indiba basakobade ong'ja.

Minggipin, me'chikrangni gitcherachi merong momitingo ba merong kerokmitingo git-chera ba ruanko jaktuatoba saoba sokgipa sokbanasienga ine bebera'a; aro saisoronga. Indaken basakobade mama ada ba mǎ'drangrang sokbaronga.

A'gilsakni pilak jatrangon rokom rokom bebe ra'anirang donga.

A'CHIKRANGNI BEBERA'ANI

A'chikrangni rokom rokom bebe ra'e mani-anirang bang-bea. Te'brongko ge'ode mande dal'ako ba'e ge'osa biterang dal'dala aro bi-kop-rangba dal'dala.

Me'rakku ge'ode ka'dinggija ge'na nanga, ka'dinge ge'ode birong bang'ja aro wakeloka. Me'rakkuko ge'oba bi'sa dal'kalako ba'e ge'ode bikop ganggilpile nama.

Narikel, gue ba wa'geko ge'ode mande sia.

Ge'gimin bolrang kraa gita dal'ahaoba bi-te nangjaode ja'pingo chone a'kol pua, ukon kasia ine agana.

Saksa sakgipin baksa maikoba dakna kum'ong-grike agangrikmitingo ba maibako dakna re'chakatmitingo mande ba jillanirang atching-chan-gode, mamung namgni griaha.

An'tangni ma'drangni ba gipinni groni gim-in re'angmitingo chipuko grongode, gro bakroa ba matchotningjawa.

Buringo bol wa'a, krong wa'tong ba am-pangrangko ra'e dongimin aro den'e dongimin-ko ra'ode ba cha'uode nok wa'al kama ine be-be ra'e dakrongja.

Buringo bija nokma, bijakol ba bengbeng sa'ako nika dongode sa'chakram bolko den'bake bolsep wa'sep ba samsepe dontoka. Uko nikode sakgipin nike kangmanaha ine dakjaha, dakdraode wa'ku wa'rengo nanga ba snare dambini chika ine bebe ra'a.

Sakgipinni a'jri galgimino am'pang chaode uko sing 'chenggija ratrongja. Pilakniba ong'gi-jagipa am'pangdamko nikoba uno samsepe ba katottenge dongiminko nikode, sakgipin nike uko kangaha ine dakjaha. Uko dakdraode maiba a'sel ong'a ine bebe ra'a.

Sakgipinni a'jrio te'rik, jal'ik ta'a baring, e'ching, rasin aro gipin bosturang dongengoba ram ram

den'ja, akja aro ra'ja, maina nokgipa nikjaoba mite mande nikskaenga ine kenani ba bebe ra'ani gnang.

Songgitcham nokgitcham galgimino an'tangtangni ge'gimin te'brong te'rang aro narangkampil ba gipin gipin bolrangni bite bibolrangko cha'ana agre, sakgipinrangni ge'gimin bolbite wa'biterangoniko cha'malja. Sakgip-inrangni dakgiminko cha'ue cha'ode ba ra'ode, nokgipa nikjaoba Niongipa nidogipan nikskaenga ine bebe ra'ani gnang.

A'dalo ba a'brengoba ge'gimin bosturang minahaoba mitena chinchenggija ba runalchenggijade cha'malja ba ringmalja ine agana.

Mitena chinchenggija aro rugalchenggija cha'ode ringode, Patigipa Ra'rongipa ka'onganga aro matdija panchija (mikkangchi patiangjawa) ine bebe ra'a.

Walo ba pringo deansengo (bi'sa atchiode) song gimikan a'bachu re'tokjawa, maina marangsterang ong' a ine bebe ra'a.

Bi'sa demikkang nikode ua bi'sani bibalkogopna krae a'kolko cho'enba ka'snesa donate gopna nanga. Rangsang galsruataiode bi'sa to'tro ong'raka (kenraka) ine bebe ra'a.

Mande sio ganchina bol ra'gimin gitchana nangja, aro gopna a'kol cho'mitingo ja'a ba jak

matna nangja, bolrang gitchoade aro ja'a jak matode mande sitaia ine bebe ra'a.

Mande sinasio sre otode sakgipin sitaia, sre gimikko bon'e otode, nokgimae sia ine agana.

Mande sigiminko sarao ganchi rike so'on sigipani jak nokchina de'ode ua nokni mande sitaia. Gipinchina de'ode sakgipin siskana.

Walo bi'sa desa tusimitingo nokona jo'ong guk re'baode so'otna ba kal'akna on'ja. Bi'sa-rangni janggi jamarang guk jo'ong pil'e roama ine bebe ra'a

Jik se kimgimin me'a ba me'chik siode, uko a'kim watkujaode, uko sakgipin me'a ba me'chik kimode dai nanga, uan a'kim ba kanggimin ong'enga.

Badiaba maharioniko matcha chikode, ba mongma dokode, ua mahari matchani ba mong-mani a'kim ba bak ong'a ine bebe ra'a Ua maharioni siode, unona matcha ba mongma re'baronga ine agana. Indake bebe ra'ani bang'a.

DO·ARAN

A'chikrang do'aran ba do'rangding minga. Ua do'oko wachi kario nikrongja. Wachi ra-

gatoso ba a'rak sokbahaosa a'kaweo mande-rangni sararango roako nikronga. Ua do'oni jat jeo ba'oba pangnan ki'me aro be'enko mojip-jipkamaia. Indake mojipjipon uni ba'ram moodo ba on'tisa il'engode rang'san bile kataia. Indakani a'selara, chengo do'aranni atchu ambi a'anma ringro ringro, chianma jingjo jingjo dakmitingo a'an rae kakuja, chian rongdakba-kujamitingo (a'an rakkuja), a'an kolgapgijachi, chin daksokgijachi bilange ma'bakeoara giputrome sitokaha.

Indake ong'ani giminsa uamangni deritchurang kentokaha. Uko gisik ra'esa jeo jao ba'oba ba ma'bakoba mojipjipchenge nichengronga ine aganronga.

Jatni nama dakbewalrangko galna nangja. Batesa nambatroroataniko dakna nanga. An'ching ma'gitcham pagitchamrangni nama dakbewalrangko galangroroengani gimin namang jaenga.

ME·TRA PANTE

Badiaba song damsao adita pante me'trang dongachim. Songo badita pante me'trang bang'a, songba nokba an'senga. Ua pante

me'trarangoni sriksrik mikcha namnikgrikengachim. Parake daknara me'chikara nokkrom (nok man'rikgni) me'asakoara mamatang nokkromna kanggimin ong'achim, Uamangni mikchagrikingako ma'a paarangba, me'traska aro pante-skarangba uijachim. Pante gisepo me'chikni nokchi roeronga. Me'traba ta'jong, ta'marang aro ta'bolchurangko rite on'rongachim. Basakoba bijak namkalode mikoba cha'atrongachim. Me'trani ma'a paa uarangko nikrongachim. Indiba ramram ong'aia ine uamang chanchiaiaichim. Indaken bang'a salrang re'angaha.

Salsao me'trani ma'a paa aro nokgimikan a'bachire'angtokaha,ua saksan mi ramna noko dong'rikaha. Noko mande donggijako nike pante me'trani nokchi re'angaha. Uamang nokgil sreko asonge, an'tangtangni mangsonganiko suk ong'en golpo ka'e roaha. Me'chik aganaha, 'Angade sibo tangbo nang'kode watna mangsongjahane, nang'ko maibakai man'jahade' sakgipin pante-kode nambeoba seng'beoba ra'nan mangsongjaha. Segri randian dongsrangaigen. Angan ama apani nokbichong durubolnadongipa ong'a. Apa an'tangni gri sokchi chongmotkon angna minge kange dim'e donenga. Indiba angara mikkisep mangchiba ninan sikjasrang. Apani jong griko rajani gimin nokjam ranggamko angna on'jahaoba anga mikbokja. Kangal cha'asigen ong.-

oba, nang'ko man'jokode uan angnade chu'ongbejok aro gipinkode nangjajok.

Panteba aganskaaha, "Angaban nang'ni agana gitan apsan gisiktango chanchie dongenga. Na'a maikai angni chanchia gita chanchisoake," ine ka'dingsmite aganaha. Angni mama dal'gipa, amani angko demikkang nikaonin, kotip ba'ra on'en nokkromna, demechikko ba'na skangan kangsoaha ine ama angna agana. Mama dal'gipa a'king goereni nokgipa ong'a Mi, misi, ranggam, matchu matte donga. Ama apaba nokkromna watna sikbea. Sakgipinkode kim-at-dongatnan sikja. Mamani demechikkoara Sore minga. Uan nokko man'rikngipaba ong'a. Mikang bimang, an'gil bigilba kraen daknangpara da'nang. Jeani galanide dongpaja. Indiba nang'mung tosusagrikode mamung gitan ong'-paskaja. Indaken angara mikcha namniknaan man'ja. Nokkrom ong'e pilak man'gnirangko man'rikgen ong'oba, da'odipet uarangko jean jabol gitasa nikaia. Nang'ko man'jokode uan chu'ongbejok. Maibakai nang'ko man'jahaode, jikgrian brangjojoe sisranggen angade." "Indide an'chinga aganme'apa gita, kato rama dingsanko katna, sioolbak ko'sano sina" ine ku'monggrikaha. Ta'jong me'diksa ritako cha'e golpo ka'e roaha.

Bang'a salrangni ja'mano uamangni ma'a paarang aro ripengskarangba uamangni kamrangko

nike uitokaha. Uni gimin me'chikni ma'a paa aro jong adarang doke sate saee manenge watgrikatna joton ka'beaha. Indiba man'jaha. Me'asani ma'a paa aro mamatang dal'gipa ka'orangeba aro ka'saachiba rokom rokom agane ski-beaha. Indiba watgrikatna man'jaha. Ja'mano uamang tunapgriksrangaha. Da'nang, uamangni ma'a paarang duk ong'e,kratchae dongnanangaiaha.

Uamang bilsisa bilsignimangna kusi ong'e Ku'mong nangrime, nokrik nokdake, game su'e cha'aha. Uamang degipa saksako man'aha. Adita salni ja'mano jikgipa segipana ka'saaniko kraa gita dakangjaha, aro mande ra'anirang dongangjaha. Segipani ge'etanirangkoba ra'bre-jaha.⁴ Aganpaanirangkoba knachakgija namrengmreng dakaiaha. Kata rinoke, ku'rang chinoke segipana aganrongjachim. An'tangni jang-gilsako ba'enggipa bi'sani grapode jakskuchi pingpak pingpak dakpile su'tingtingataiachim. Uaranko nike segipani agane beng'paoba, bat-esa segipani sambaona re'bae onbrake galaia-chim. Maiba maiba bosturangko ra'bapachina ge'etpaoba, "Na'ade ra'epanara jak grima," mi bijak donako nikjana sing'paoba, mikron do'si otama am'e cha'nara, ine aganaiachim. Indakarangni gimin segipa sae manenge,doke sate ra'paoara, "Na'a angko sie dokjaode nang'mani gando patako enge galsrangbo," ine aganpilaia-

chim. Turam tutipo ka'sne agane skie ra'paoba salsa salgninasan namkalaiachim. Song'o meseki gnanng song'rongaiachim aro ko'a chian'cheng gnanng ko'aiachim. Cha'oara kniding gnanng cha'a, ringoara chiancheng gnanng ringa. Iarangni gim-in segipa namatna ine joton ka'beoba pring at-tam kajia ong'simsima gita dakpilaiachim. Uarangko ma'a paarang nikpaoba, "Namjok da'ode, beng'ako kangako ra'gijagiparangde indaken ong'ronga," inesa agane rotokaiaha. Segipa da-nang namen duk aro kratchaa man'e, sintie aganaha :

"Chi'a ine ringachim mesengsa,
 Toa inesa cha'chim ka'asa.
 Aman 'apan 'beng'ako ra'gijani,
 Aiao ! nikaha gose knachakgijani,
 Gisiko chanchiade nambea, aiao bisi !
 Mesokenga be'entango ong'a ganchi
 Mikkol dare cholchole, grap ninioba,
 Bolchong agal be'en pil'e kalimoba,
 Indioba nampilna man'jawaha,
 Tangana batede sion nambatgenaha.

Iarangko agane a'chi bamchikope, jaksi su-chokchoke grapbeaha. Jeba ong'bo, songna nokna kratchae aro detangna ka'sae, adita ja sal-rangna chakchike dongangkue jiktangke ka'saachi mol'mole namatna dakbeaha. Indiba namatna man'jachim.

Uni gimin segipa, jikna, dena, nio obite aro chra denaba agangija ba'ra boari, re'jak pak-kol seperi, ma'a pana. ma'drang nodrangna agangija aro mikkang pa'gijan chel'bea songchina walo sriksrik katangsrangaha. Da'nang, me'asani ma'a pasa jik dena dai gamrikaha.

Indaka kamkon " Aganakon ra'ja, kokarengkon olja. Grongtangan mata ja' sitangan bu'a " ine aganronga.

" Chanchipabo A'chik songni me'trapante-rang,

Niatpabo ong'engako poraienggiparang.

Chel'achi niatnable, nang sepangon,

Nikaigen ong'giminko, nang a'songtangon.

Chanchie ka'tongo kusi'ne bisi,

Be'entango mesoka, on'e ganchi.

Srek wa'tre sale riknabe rangkambeo,

Gado'ba ga'akpilgen, nang' a'gilsako,

Chu'sokja, chu'sokja, nang chan chiade.

ong'nikbea ka'tongo chanchiatangkode.

Wal'bima dongengoba, wal'tot totengpiti,

A'ba gama bon'eba, rama bakengpiti."

TIMAN

Song damsao Timan minggipa mande dongachim. Ua salsao an'tang baksa a'sul cha'gipa mandeko walo a'ba tuna ine ku'monggrikaha. Meatam cha'mano Timan ripengtangko rimjolna ine uni nokchina re'pakangaha. Indiba uni ripengde meatam cha'kujachim. "Na'are'sobone, anga ja'mano re'anggan" ine uni ripengtang una aganataha. Timande saksan re'soe, borango dama doke, bangsi sike, hohoe a'boke kusi ong'e rosoaha. Waltingahaoba, uni ripengde re'bakujachim

Adita waltingani ja'mano a'ba ramachi bilchamni dimbrak dimbrak wa'alko niksoe, ripengtang re'baengjok ine kusi ong'soaha. "O Timan" ine okamrroe re'baaha. Timanba okama ku'antinan ku'chakaha. Borang jang'kipangona sokoa "O Timan" ine okamtaiaha. "Re'babo, maikai ruutbara na'ara" ine ua manengsoaha.

Rang'san jang'kiko maldoange, do'gacholo rimpakkrange, "Hai, Timan, an'ching da'alde dimalgrike (saldokdokgrike) rona. Na'an skang gonggonge on'chengbo. "Na'are sawa?" ine nido'e sing'aha. Maina ua ripengska inesa chanchiaichim. Indiba nikahaoa, aiao' sko mat bitip, ki'sang dengreng ki'tik aro chelo mikron donggipa bimangkosa nikaha. Da'nang, Timande dil'dil

gokgok dake dongaiaha. Katpanaba raman dong-jachim. "Bakbak gonggongbo" ine me-mang aganaha. Da-nang, Timande jamang jumang dake gonggonge on-aha.

Me-mang Timanni gando ki-pilko rim'e dimale (saldokdoke) walgimik roaha. Timande sibok-pilaha. Uni ripengde re-bachipsrangjaha. Pring do-gisik wal seng-osa, "Knal atamode mamasa nang-ona rona re-bataigen, na'a dongsobo" ine agane re-angaha. Da-nang, Timanni ki-sang ki-seprade makkreni ki-sang gita gitcakkrangkrang dakpilaha. Salchugraosa miksele gengwak gengwak dake gonggonge malame re-baesa jenten nokona sokbapaaha.

Skangni salrangode a-ba tugipa manderangko rokom rokom kal-akanirang bang'a ine agana. Pantekarang saksa sakgipinko "O Timan" ine okama dakenba gando ki-pilo rim'e saldokdoke kal-grikronga.

Skangni chasongni salrangode mangchara (nawang chaa), tongte dina, matchadu matchabet, pahon aro rokom rokom bimangrang pil'e manderangko kal-akronga aro dakgrikronga ine agan-ritinganirang bang'en gnang.

MONGMA ARO MAKKRE

Badiaba burung bolgrim damsao mongma aro makkre damsan dongachim. Uamanga meligrik-beachim. Salsao uamang maiba a'selni gimin jekrikani ong'aha. Mongma aganaha, "Anga mai-rongpile nan'gna bate dal'batgipa aro bilakbatgipa ong'a." Makkreba aganskaaha, "Anga mai-rongpile nang'na bate bakbakningbatgipa aro gisik seng'batgipa ong'a." Mongma aganskaaha, "Atcha, indide na'ara bolko salgomna man'ama? Makkre aganchakaha, "Man'ja man'ade, indiba na'a aganbo na'ara bolkambeona maldona man.ama?" Mongma aganchakaha, "Man'ja man'ade, indiba bakbakninggipa aro gisik seng'gipa ong'ana batede bilakbatan aro dal'batan nambata".

Uamangni sepango dongenggipa do'po mangsa uamangni jegrikengako knae aganaha, "Wai, na'simang jegrik-ingriknade, gisik gnang begipa do'po re'chim budepa mangsaona re'ang chimbo. Badian nambata uan uko na'simangna agane on'na man'gen." Uni aganako knae manggnian do'poni ku'patianiko namnike sing'e nina damsan re'angtokaha.

Uamang do'po re'chim budepaona re'ange sing'eaha, "Chinga saksa sakgipin baksa meligrikna man'jaenga, ka'sapae agane on'pachina inesa chingade nang'ona re'bapaenga. Badian

nambata, dal·batgipa aro bilakbatgipanma ? ba bakbakninggipa aro gisik seng·gipanma ?” Gisik seng·gipa do·po budepa aganaha, “ Angni aganako dakchengbo, unon badian nambata uko anga na·simangna agangen. Hawa chibimako batangbo aro hawa nikatenggipa bolni biteko angna adita ra·babo.

Uni agana gita uamang namnike re·angaha. Uamang chibimaona sokahaon, makkre kene chrike aganaha, “ Angara maikai ia chibimako batna man·gen ? Je cholchiba batna man·jawa. ” Unon mongma ka·dingmisie una aganaha, “ Angni janggilo gakatbo. Anga ia chibima mang·mangna nang·ko jrobate re·na kenja. Bakbakninggipa aro gisik seng·gipa ong·anina bate dal·batgipa aro bilakbatgipa ong·an nambata ine anga aganjachimma ?” Makkre kratchae mongmani janggilo gakate chibimako batangaha aro bolona sokangaha.

Ua bolara dokrobeachim. Bolni biteranga chubatgipa cheksirangni ku·chotosa nangachim. Mongma bolni biterangko man·na gita bolko salgomaha. Indiba man·jachim. Bolko pe·tongna krengbeaha, indiba man·jachim. Je gita joton ka·taitaioba man·jatelaha ine nike ,ua duk ong·bee aganaha, “ An·ching biteko man·gijan do·po budepaona re·pilna nangaignok. ” Makkre ka·dinggakgake aganaha, “ Na·a maina duk ong·ade

biterangko anga nang'ona ra'onbagenba. Ia bolko anga nengrachokchok maldoangna man'ai-genba. Dal'batgipa aro bilakbatgipa ong'ana batede, bakbakninggipa aro gisik seng'gipa ong'an nambata ine anga nang'na agankujama?" Makkre rang'san bolko maldoange minenggipa bolni biterangko adita ake galonatha. Mongma uarangko kolamsoaha. Makkre a'aona ong'onbae, skang gitan uamang chibimako batbae do'po budepaona sokbaaha. Uamang bolni biterangko do'po budepana on'e aganaha, "Nang'ni agana gitan chinga dakaha. Da'ode chingna badian nambata aganpabo." Do'po budepa uamango sing'aha, "Sawa chibimako jrobataha?" Mongma rasong chae aganchakaha, "Anga" Do'po budepa sing'taiaha, "Sawa bolni biterangko akaha?" Makkre ki'sangtangko doktop-tope aganaha, "Anga." Gisik gnangbegipa do'po re'chim budepa aganaha, "Basakoba basakoba dal'batani aro bilakbatani nambata aro basakoba basakoba bakbakningani aro gisik seng'ani nambata. A'gilsako ia mingg'ni dakchakgrikaniko nangronga." Unon uamang kakket ong'bebea ine ma'siaha aro uamang gisik gnanggipa do'po re'chim budepako mitele kusi ong'e re'angtokaha.

Saksa sakgipinko chonnikgrikna nangja. Maina sakprakprakon maiba mingsasikkode dakpana

amani gisik dongpara. Chonnikgrikaniara gisik grianiko mesokani ong'a.

MAKKRE ARO ARINGGA

Chichang dal'gipa damsao aringga aro makkre kabesa kagimale' dongachim. Uamangara namen ka'sagrikbeachim. Salsao makkre aringgako bolni biterangko am'e cha'e rona ku'mongaha. Uamang bolgrimona re'angaha. Bolgrimo bite mingiparang bang'achim. Makkre bolchi gakat-ange, ripentangkoba gakatdobachina aganataha. "Ripeng, angade bol gakatnan man'pajake. Na'an ake on'atpaaibo." Indake makkre ripengtang aringgana ake on'ataha aro an'tangba cha'aha. Aringga Cha'e nioa chi'amung, toamung aro mitimamung dake nikaha aro ua suk ong'en cha'aha. Indaken uamang salsal re'bae cha'erongaha.

Salgipino aringga an'tang jikgipana cha'e nipa-china ine adita biterangko ra'ange on'eaha. Jikgipaba cha'e nioa namen tonikbeaha aro ua segipao sing'aha, "Na'a ia biterangko baoniko man'a aro maikai akbana man'a?"...Angni ripeng makkre ake on'atpara," ine segipa aganchakaha. Union jikgipa setangna aganaha, "Na'a

bakbak re'ange nang'ni ripengtang mak-kreni skoko angna ra'ebo. Maina ua pangnan namnam-begipa biterangko cha'rongani gimin uni taningde baditan mitimenggen. Anga uni taningko cha'e nina nangchongmota. " Uan angni ka'sabegipa, namgipa aro kakketgipa rip'eng ong'a. Anga maikai namgipa ripengni skoko nang'na ra'bagen" ine segipa aganchakaha. Jikgipa agantaiaha, "Na'a makkreni skoko angna ra'ejaode angaba nang'ni jikgipa ong'jawa ine na'a uiho. Anga tanganade sion nambatsranggen" Jikgipani rakbegipa kattako knae da'nang, segipade namen duk man'beaha. Maina makkreara uni nambe-gipa ripeng ong'achim.

Indiba segipa jikgipani dekdo on'chaaniko chak-na amjae, duk ong'bee ripengtangona re-angaha. Makkre ripengtangko niksoe kusi ong-aha. Aringga ripengtangko tol'mikna a'bachenge aganaha, "Ripeng, na'ade changsamangba angni nokchi-jamchide rona-chonaba re'pakujake. Angni jikgipa nang'ko nikpana pangnan ma'ringkamai-enga. Hai, da'alde na'a angni nokchi re'na nangchongmota". "Ripeng, angara maikai nang'ni nokchi re'pana man'gen?" ine makkre aganaha. Aringga aganaha, "Ripeng, angni janggal kosako gakate re'na man'genba." Unon makkre aringgani janggalo gakate re'angenba aringgani nokona sokeaha. Makkreko niksoe

aringgani jikgipa kusi ong'beaha. Aringgani jikgipa makkrena aganaha, "Na'ade pangnan tobegipa, chi'begipa aro mitimbegipa bolrangni biterangko cha'rongani gimin, nang'ni skooni taningde mairongpile mitimenggenmo. Unasa nang'ni taningko anga cha'e nina nang chongmota ine nangko angona rime ra'bachina angni segipako watataha. Da'o na'a re'bajok namjok, Anga nang'ni taningko cha'gnok." Uko knaenba makkre namen kenbeaha, ua duk man'e jokani cholko chanchiaha.

Makkre aringgani jikgipana agancha, "O, oh! na'a angni skoni taningko cha'e nina sikchongmotode, mainasa na'a nang'ni segipana tale aganatjajok. Anga angni taningko ra'bajole re'bana man'genchim da'nang. Maina angni taningko nokosa donronga. Da'ode angni skoode taning dongjake, angni nokchi re'pilbo, angni taningko bakbak ra'galgale re'bapilna man'gen". Da'nang. aringga jikseasade makkreni tol'akon uisokjae aiao inmanaha. Unon aringgani jikgipa segipako makkreni taningko ra'egalgachina ine watatpilaha,

Aringga makkreko janggiltango gate uni dong ram bolgrim chichangona rimbaaha. Makkre bakan a'gaona bilchroke bolchi gkaatange bichonggrimo asonge nionate aganaha, "Ripeng arringga, da'o na'ara nang'ni skooni taningkoara noko donbama? Da'o na'a re'angpile nang'ni jik-

gipana taningtanko dokgoke on'ebone. Nang gita gokagipa ripengko anga mamungsaloba nikkuja. Da'o an'chingni ripeng ong'grikani sal bon'aha." Aringga ku'gopagop dake duk ong-bee noktangchi re'angpilaha.

DO·DE ARO DO·SING

Badiaba bolgrim damsao do·de aro do·sing (moena) nono abi ra'grike damsan dongachim. Uamang ka'sagrikbea aro nangrimgrikbeachim. Do·deni grang, ki·me nitoachim aro ja'aba rimie nitoachim. Bimangba dal'a aro skoo basu dongachim. Do·singni bimangde nitoa indiba ja'a nitopajachim. Uni gimin ua pangnan duk man'a aro do·oskarangna kratcha'achim. Do·sing do·de ni ja'ana mikbokkame dongengachim. Maikai uni ja'ako man'gen, ua cholrangko man'na do·de baksa rorongachim. Da'nang, do·de do·singni okningo wagam chae, chiningo ja'ga saengakode mamungba uipajae nono abi ra'e roengakode uipajaha.

Salsao do·singko uni ma'drang do·sikni bia ka'anoa re'bapachina okamataha. Do·sing re'angnade gisik sikbeengachim. Indiba an'tangni ja-

arang nitopajani gimin ua kusi ong'jaengachim. Salsao do'sing do'deona re'ange mol'mole aganaha, " Abi, angni ma'drang do'sik knalo bia ka'na am'eanga. Unona angkoba re'bapachina okamatengachim. Angaba re'angpanade skachim. Indiba angni ja'arang nitopajani gimin kratchaenga. O, abi, na'ara nang'ni ja'arangko salsa salgni mangmangna sreangpakuna on'pana namnikpagenma ? Anga bakkakan on'epilgenchim ".

Abitang do'de ka'sachake an'tangni ja'arangko salgnina sreangna on'e aganaha, " Nono, ka'sapae bakkakan on'epilbone. Da'o anga nang'ni ja'arang daknangjaoba ra'rikgnok " ine agane sregrikaha. Do'sing kusi ong'bee bia ka'aona re'angaha. Bia ka'ao ua cha'e ringe kusi ong'e chrök measae an'senge roaha.

Do'sing sal gipino songtangona re'bapilahaoba, do'dena ja'ako on'epiljaha. Do'desa changni chang do'singchi re'ange ja'atangko bi'aha. Indiba damo, intango, knalo on'gen ine pa'sikaiaha. Je gita bi'oba kate jokaiaha. Uni gimin do'de ka'onange suna rikoba srapjaha. Maina do'dea be'en dal'a, ki'me ro'a aro jrimachim. Da'nang, do'de ka'ara amja, bilara sokja dake dongaiaha.

Indakesa da'ona kingking do'singni ja'arang rimate nitoa. do'deni bimang; grang aro ki'me nitooba ja'arang nitopaja ine aganai gnang.

Jean bebe dakani gisik dongja, uamang ripengskarangna bebegijako dakbate dukko on-ronga. Nampinike dakako uina neng'bea. Ku'sikoa bija bitchi, Okningoa matcha bisi.

MATCHA NOKMA

Badiaba a'dok damsani burung bolgrim damsao matcha mangsa dongachim. Ua an'tangko ua a'dok gimikni nokma ong'a ine pilak matburungrangna uiataha.

Salsao matcha nokma pilak matburungranko okamate, jatprak ba ma'malprakan bilsio an'tangna a'wil on'na nanggipako tik ka'na nanggen ine aganna okamattokaha. Pilak matburungrangan re'bae bilsiprako mangprakprak chike cha'na man'gen ine tik ka'angtokaha. Uko matcha nokmaba namnikaha. Ranggolni jatde ja'manchake re'angna nangaha, maina gipinrangko srappajaha.

Ranggol rama bijangchio makkreko gronge ing'aha, "Na'ara matcha nokmanara bilsiprako maikai a'wil on'na tik ka'baaha" Japrako mangprakprak a'wil on'gen ine tik ka'baaha," ine aganchakaha. Ranggolba matcha nokmaona

re'ange, japraکو mangprakprak nang'na a'wil on'gen ine aganaha. Gipin mamalrangna bate a'wil on'na ku-rachakani gimin matcha nokma kusi ong-beaha.

Pilak matburungrangan tik ka'gimin gita bilsipraکو mangprakprak matcha nokmana a'wil on'tokaha. Indiba ranggolde japraکو mangprak ka'e bilsio mang chigniko a'wil on'na nangaha.

Tol'ara namja, uagitan mitamrang an'tangtangde banggija dakaia. Gipinrangkode bang'en dakata. Gipinrangko skangata, an'tangtangde ja'man donga.

TENGTON I

Badiaba song damsao Tamonni depante Tengton minggipa dongachim. Ua bi'sa intal nagrak dakbeachim. Ua agancholetna, aro tol'na changgipa aro bi'saskarangni kosako an'tangko pamong dakna changgipa ong'achim. Ua ma'a paa aro gipinrangkoba rongret cholet aganna aro dakna changgipa ong'achim. Indaken ma'a paa uko Tengton nagrak mingachim. Untal uko Tengton nagrak ine pilakan mingtokaha.

Tengton dal'a chu'soknasion uui ma'a paa siaha. Ua nokrik-nokkdakna gamna-suna changja

aro aratbeachim. Ua ma'a paani ja'mano noko songo donggija, songgipinona katange jik dong-eaha. Ua songo noko dongoba, noksul songsul aro ripengskarangmung melija aro ga krajachim. Batesa ua songni manderangna bebesusu ong'na kragipa katarangko agane tol'na aro togina changbeachim. Ku'sikara bija bitchi okningoa matcha bisisachim. Songni nokni jila matchu, do'bok aro do'orangko cha'ue doke cha'aia aro palaiachim. Indiba uko rim'srangnade man'ja Mandekode uia, potnara man'ja. Uni gimin songgimikan uko ka'onange a'rikgalaha. Indaken songoni adita chel'a biapo ua alamala noktop rike jik deko dongdilaha.

Tengton chel'ao dongoba, songni mande-rangni namnikgija kamrangko daktaitaiani gimin song gimikan ku'monge, Tengtonni nokko walo mande gnang so'chipe galsrangna tik ka'e donaha. Indiba Tengton uamangni mangsongako uisoe, pilak bosturangko walo bu-rungona rikae dontokaha aro an'tangtangba kate dongnuaha. Songni manderang da'ode Tengtonmang nokgimikan tusimipekenggnok ine chanchie, do'gacholranko kachipchangtoke dongdule so'aha. "Da'ode denggu Tengton nokgimikan tappra changgnok bia," ine songgimikan kusi ong'aha.

Pringwalni Tengton chakate nok kamgiminni sambao jamdap rike, bosturangko ra' bapile dongeaha. Uamang nok kamgiminni pilak tapprarangko chimonge dontokaha. Pringo songni manderang nok kamgiminko niatoa, nokgimikan kusi ong'e tapprarangko chimongtokengako nikate, manderangma, me'mangrangsama ine aiao inmantokaha. Maina uamangkoba nok kama baksa kamchaptokaha ine uamang chanchiachim.

Mai ong'chongmota ine song gimikan nampinika dake Tengtonni dongramona re' batokaha. "Maina tapprarangko chimongenga," ine sing'ea daktokaha. Tengton mamung ka'onanga aro namnikgijaniko mesokgija, ka'dingsmite aganaha, "Ripengrang, na'simangni angni nokko so'anina anga na'simangko mitela. Maina angna namen dakchakbeani ong'a. Maina anga noktango sonara jakan ja'an re'ja, Saoba ka'sae angni nokko so'paode nambegenchim, ine gisik tango ma'ringe dongengachim. Da'siwalo na'simangan angni nokko so'jok namjok. Anga ia chimonggin tapprarangko, antirango, aro songrango re'jojoe rorirangna palna mangsongenga. Maina nok wa'al kamgiminni tapprade namen gamchatbea Uni gamchatanikode rorirangsa uibata. Nok wa'al kamgiminni tapprarangko nokking kosakchi gopiprae dontokode mamung saloba nokko wa'al kamjajok. Skango angaba apasagi Tamonni da-

kako nikaha. Rorirangde namgni ong'ako nike dam rakemangba ra'seksekangetokaia" ine Tengton aganon ku'gra ku'gra knatimaha Mitamrang namen bebe ra'aha. Mitamrangde on'tisa kenchakaha. "Atcha, uni tappra pale man'bara tangkako nikuna, ine mitamrang aganaha.

TENGTON II

Tengton manderangni mikkangon tappra-rangko ba'rarango katomenba palna re'angaha. Songoni chel'e ripe'angenba tapprarangko chibi-mao pake galetokenba, gipin songchi re'angaha.

Tengton apalo hal gamenggipa budepa buchuma jiksesako nikeaha. Ua hal gamenggipa buchuma budepa jiksesaona re'ange, ua hal gamenggipa budepani gitchimako bi'enba a'se sambania'ako krenge cho'aha. Uko budepa nikenba sing'ataha, "Na'a mainasa a'ako krenge cho'enga?" "Chi ringna sikbeengani gimin chi nama aro ka'sinako ringna gita cho'enga, maina a'palni chiko ringnara ringkuchia, " ine Tengton aganchakaha. "Aiao, na'ara badita cho'e chiko man'galgalgen. Sal gimik cho'osa chiko man'naba donga. Indake dakani palde, hawa, nikatenggipa

angni nokona re'anggalgale bi'sarango bi'e ringe-pabo, " ine budepa aganaha.

Tengton a'a cho'ako dontonge mesokatgipa nokona tongtong re'angaha. Ua nokni bi'sarango " Nang'pani nokkrao gopgipa tangkako bile ango on'atbona. Hawa a'ba a'seo nikatenggipa matchu palako brenakana. " ine Tengton bi'sarangna aganaha. Maina rakkualrangba a'ba a'seo matchu-rangko nirikengachim. Indiba bi'sarang Tengton-ni aganako bebe ra'na man'jae on'jaengachim. Unon Tengton a'pal gamgipa budepana " On'jana, on'jana, " ine chrike aganataha. Uko knasoe budepa, " On'jaode ia lorune, " ine mesokatenba to-dingdinge dedrangna aganataha. Dedrang pagip-ani aganatako knae aro todingdingatako nikate dokna kene tangka gopako bilenba Tengtonni jako on'ataha.

Tengton tangkako ra'e noktangona reba'aha-ua atamo nokona sokbae, tangkako bol ja'pango pakbrake rong'teo goe channa dakaha. Tengtonni tangka chanengako songni mitam manderang nikate, saksa sakgipin bsaka agangilgilaha. Ja'mano_songni manderang Tengtonona re'batoke, " Bano, ni tangkako man'e chanenga Tengton?" ine sing'etokaha. " Na'simangni nikrikgipa tapprako paleani tangkawai, na'simangni angni nokko so'ara angnasa man'dapani ong'aha, ine anga skango na'simangna aganjachimma? Angni ra'anggipa

tapprako rorirangan kangsekseke dam on'ding-dange ra'bildangtokaia. Angni nokan chonani gimin tappraan bang'pajae tikpiljaha. Aiao, tappra ban. ogde tangkakon ripebana ampilbajawa-hachim " ine Tengton uamangna aganaha. " Na'-simangba ang gita tangka man'pana sikode noktangtangko so'enba tapprarangko chimonge, antirangona aro songrangona olroroe rorirangna jararang! palepabo ine Tengton manderangna aganaha.

TENGTON III

Songgimikan Tengtonni agana katarangko bebe ra'tokenba, noktangtangko so'na chanchitokaha. Indaken uamang noktangtangko so'tokenba tapprarangko chimongtoke, nokgimikgimikan anti-ona olange oprake paletokaha. Sal gimik anti be'aona kingking ki'sang asongchimitpile paloba saksamangba sing'ding sandinge nigipaan dong-pajachim. Uarangko nike, palgipa'rang ka'onange ku'bososo dake saksa sakgipinko nitat-grike, Tengtonko ka'onangtokaha. " Hai an-chinga Tengton dengguni matchu bima jil-gipako dokgake cha'srangna, " ine ku'monggrike tapprarangko gale songona re'baaha.

Songona sokbaokahaon uamang Tengtonni nokchi re'angtoke, ka'onange rokom rokom ku-atogija katarangchi dokna satna am'pile saitokaha. Uamang an'tangtangna dal'bea tol'aniko aro krat-chaataniko dakahani gimin ka'kamtokahachim. "Ripengrang, angko ka'onange dokna su'na skang-ba, ka'sapae angni katako chakchike knatim chengpakubo. Tapra ra'gipa aro badinggipa manderang da'anpako antiona re'batokjaha. Gipinranga trapprani gamchatani aro namgnikon uitokpaja. Ramram manderangde uija. Unbaksaba na'si-margba taprani gamchata ba namgniko agane paljaenggen," ine Tengton uamangna aganaha. Unon mitam manderangde, "Ong'ade ong-bebea da'nang, " ine agantokaha. Indiba ka'dot dakgiparang knachakgija Tengtonni matchu bimadoko dokgake cha'na modrae ra'angaha.

Uko nike Tengton aganaha, "Ripengrang na-simang angni matchuko doke cha'bo cha'ade, indiba ka'sapae, angna bigil, aro ja'teng ge'brini grengrang aro sko bikrok mang'mangkosan on-paibo." Songni manderang Tengtonni matchuko dokgake cha'enba, uni bi'a gitan ja'teng ge'bri bigil aro sko bikrokko ra'bae una on'eaha. Da-nang, be'enkode tin'samangba on'pajaha, Tengton uarangko salo rame ran'ataha. Ja'mano ua matchu bigil, ja'teng aro sko bikrokko palna ra'angengako songni manderang nikriktokaha.

Adita chel'e re'angon an'tangna skang skang re'angenggipa mandeko nikataha. Ua mandeara saksa rori mahjon ong'achim. Uo tangka jolasa dongachim. Biap damsana soken, rori mahajon a'pal re'na sikani gimin manderangko niwil-wale, ramasamni burungo tangka jolako ba'ra pindape dongalgale on'tisa chel'kale re'angaha. Unon Tengton tangka donanggipa biapona sokbaaha. Ua ba'ra pindapako ra'e nioa tangka jolako nike ra'baaha. Ua biapo matchu bigil, jatengrang aro skoko donangskae, an'tangde burung joljol katangaha. Da'nang rori mahajonde nikrikjaha.

Tengton atam simsimo nokona sokangaha. Meatam cha'mano Tengton nokningo tangkako rong'teo goe walgimik channa dakaha. Uamangni nok gimik kusi ong'e tangka chanengako songni mitam manderang uni noksam gita rama re'pakgiparang knaangaha. Tangka channako knaggipa manderang saksa sakgipinna agangilgile songgimikan knatokaha. Pringo songni manderang Tengtonni nokona re'bae sing'eaha, "Na'ade baoni tangkako man'dambaesa da'siwalde wal gimik chantokenga?"

Tengton uamangna aganchakaha, "Ripeng na-simang badita angna namjachina dakenga, inditan angnade nambatrrobaenga. Uni gimin anga na-simangko mitelbea. Matchu bigilko rokom rokom

saarangna samna ine mikprak ro'akon chi'bonga bonga ka'e ra'bildange ra'angtokaia tikasa tik-japila. Ja'tengkoara man'e cha'gipa manderang gol'dik dake tarie jakkalna ine tong'prakkon gong ritchaprak on'dingdinge ra'angtokaia. Ra'pana am'giparang bang'engpitichim. Sko bikrokkoara me'su-samjak ge'giparang baritango sikkroke donna ine tangka ritchabonga on'beke ra'e katangaia. Barirango matchuni sko bikrokko sikkroke donode, bang'a bilsirangna a'sal on'gijan me'surang silbea. Uaranko palskaen man'dapaniko man'pilaia. Minggipin, pilak cha'ugiparangba kena, ua sko bikrokan cha'ugiparangkode chikronga ine ra'bea. Aiao, anga bang'a matchu bigilrang, ja'tongrang aro sko bikrokrangko man'anggenchim ong'ode tangkarangko ra'banan ampiljawachim. Bangal kuli nanggenchim. Da'o matchu mangsa mang-mangnide badita man'kuna, da'oba tangka ra'banan neng'grikpilaha angade" ine Tengton uamangna aganaha.

TENGTON IV

Songni manderang Tengtonni aganako namen knatimtokbeaha, aro uamangni gisik rang jrongpile bebera'tokaha. " Ripengrang, na'simangode nok-

prakon matchu bang'ani gimin doktoke cha'enba, uarangni bigilrang, ja'tengrang aro sko bikkrokrangko paltokode, aiao baditan tangkarangko man'tokbegenchim. Na'simang chanchimangeba nipatokbo. Angna bateba changni chang tangkarangko man'genchim, aro matchu mangsani damchin na'simang baditaba mang matchuko breskana man'genchim. Na'simang ang gita daktokode sakgni ba sakgittam manderangko tangkarangko ra'bana rimangbo'', ine Tengton aganaha.

Indaken songni manderang Tengtonni aganako bebe ra'toke matchutangtangko doke cha'tokenba bigilrang, ja'tengrang aro sko bikkrokrangko salo ramtokaha. Ramgimin bigilrang, ja'tengrang aro sko bikkrokrang ran'ahaon, songni manderang uarangko ra'e aro tangka oltimna sakgni sakgitam manderangko rimbitange songrangchi aro antirangchi ra'jojoe palangaha. Indiba saksamangba bregipan dongpajachim. Batesa jara goka sole, saie manengakosa pilak biaprangon man'tokaiaha. Uamang wakidik-mikkidik dake kratchaako man'tokaiaha.

Da'nang, uamang, matchurangni gimamung palpaoba ra'pagijanimung aro saia manengakosa man'pilenba duk aro kratcha'ako man'tokbeaha. Uamang an'tangtangni palna ra'anggiparangkora ramao galangtokaha. Uamang wagam chikmijile ka'onange agantokaha.

"Tengton pil'nipil, changni chang an'chingko togie namen gimabeani aro kratchaaniko dak-beaha. Basakobade an'ching gimikan, uni jakchi so'otako man'tokgen. Uni gimin da'anpakode an'ching uko so'ote galna nangchongmota." ine chanchitokaha, "Hai an'chinga da'atamo jengge watenba uko chibima dal'gipaona ripee galsrusrangna." Pil'e Tengtonni gimin uamang aganaha, "An'ching songgimikan Tengton dengguni chalaki dakako sokchakjachongmot. Jeko dakoba badeangaia jeko aganoba bebesu bebesu agane, an'chingko bebe ra'zte dukona galonronga. Mikkangchi unbaksa dongrim-cha-rimangna amchakchongmotjawa. Uni gimin an'chingni tik ka'gimin gitan daksrangna.

Uamarg songona sokbatoke meatam cha'mano, saksa mandeni sa'rao jengge wattokaha. Pringo uamang mepring cha'gija, ramao cha'na ine ra-bite re'batokaha. Pringwalni Tengtonni nokona re' batoke uamang kachipe uko rim'e jenggeo chipe ripeangaha. Uamang Tengtonko rokom rokom agane, kal'stape aganaha. Da'nang Tengtonkode mese bi'sarangni rokomari kal'ake roa gita dakaiaha. Tengton da'anpakde jokani chol dongjawaha, siani dal ong'skaaha ine gisiko chanchiaha. Rama'joljol ka'kame chonikroroe uamang Tengtonko ripeangaha. Mi okkritokahani gimin uamang Tengtonko ramao galange

adita chel'gipa chiona re'ange mepring char-etokaha. Indakmitingo rakkual saksa matchu jaksako moe re'bam'tingo jengge ning 'o mandeko nikaha. "Na'ara maina jengge ning'o nape dongenga?" ine rakkual sing'aha. "Aiao, na'a! saksa dal'gipa raja siaha, uni palo raja ong'skana aro uni jikkoba kimrikchina ine mande am'giparang angko nikenba drae rim'e jenggeo chipdrae ra'baenga. Angade raja ong'naba sikja aro ranikoba kimna sikja ine grap grape mol'moloba uamang knachakpaja" ine Tengton una aganaha. "Uamang da'o bachiaha?" ine rakkualni sing'oa, "Mi cha'na chiona re'angenga" ine Tengton aganchakaha. "Na'a re'angna gong-bebejaode anga re'angskana," ine rakkual aganaha. "Atcha na'a re'angskabo, aro bakbakan jenggeo nape dongsoskabo; angko watskabo" ine Tengton aganaha. Rakkual Tengtonko jenggeoniko wate, antang napskae dongaha. Tengton uko rang'san kachipaha. "Na'a ba'ra pin-grue dongaibo, mamungkoba agannabe, skoko gakguaibo" ine agane matchu jakko moangskaaha.

TENGTON V

Rakkual jengge ning'o donge gisiktango. kusi ong'an gape chanchiaha, "Da'ode angaba

rakkual ong'aoni jokpaaha. Ka'sagipa Susime, patigipa Saljongan angnade ka'sachakchong-mota-ha. Da'ode anga raja ong'skae ra'niko donge donga raja donge, cha'a raja cha'e dongaignok. Angna rajani biapko 'on'angskagipa mandeni jara goka ong'ako anga nikkuja aro knakuja. Jeba ong'bo, angnade namgni binasa dukni da'nang." Aditani ja'mano mi cha'giparang re'bae "Salam moha raja, na'a bakbakan raja ong'e, singhasono asonge kusi ong'e dongna man'gnok' - ine kal'stape chonnike roaha. Rakkualde agan' chakgija jrip dongaiaha. Uamang jenggeko chibimaona ripeangaha aro sokahaon, dramu dikdiksa done aganaha, "Da'ode nang'ni raja ong'skaha, an'sengbegipa biapo donge salsal kusi ong'bo; chingkoba gisik ra'pabo. Ja'mano chingkoba rimepabo. Nang'ni ning'o dongangpana gita" ine agane chibima tu'begipachi galsruataha. Da'nang rakkualsa dos gri sina nangaiaha.

Songni manderang da'osa Tengtonko mangkimana man'ahani gimin kusi ong'been ka'a dim dim daktokaha. Uamang Tengtonni kamrangni gimin chonnika gnang, mitela gnang rama re'bajoljol gopo-sopo ka'e songtangona re'batokaha. Atam salniangahaon Tengtonni matchu jaksako moe, ku'simike nokona re'baengako songni manderang niksotokaha. "Haiwa matchu moe re'baenggipara Tengton dengguanma, ba me-

mangsama?" ine aganna changpilgija jada-boda dake, saksa sakgipinko nitatgrike dongtokaiaha. Ja'mano Tengton chong'mot ine tale uisrangaha.

Pringo song gimikan nampinike Tengtonni nokona re'bagrime sing'eaha. "Na'ara maikai-sa matchu jaksako banoniko man'bae re'baaha? "Aiao! ripengrang anga na'simangna maiko agangen, aganoba na'simang bebe ra'janaba dongakon. Na'simang angni kosako badita dukrangko gataha angnade man'daproroani ong'a. Indiba na'simangnade gimaani ong'skara ine na'simang nikenga aro uienga. Badita angna na'simang namgijako ra'bara, inditan angnade man'dapdapani ong'a ine ripengrangna anga pil'ni pil aganahachim. Na'simang angko sichina ine jenggeo kachipe chio galatjama? A'bachengode angaba signok ine chanchiachim. Indiba chiona sokanga-haon, aiao, an'sengakode maiko agankugen. Rangsan chiningni nitogipa me'trajinma nichaksoe rim-sotokaia da'nang. Uamang songona rimange nam-nambegipa cha'ani ringaniko on'sotokaia. Indaka cha'a ringaniko anga atchiantal cha'ku-ringkuja. Man'e dange cha'akoba aro nok-jam namakoba aro ganding chindingkoba maiko agankugen; kangal ong'ade noksaba gri gita ong'pilaia. Uamang kangal ong'ara wa'a dongjani gimin wa'dingnasa kangal ong'aia. Song nokba an'sengbea aro rongtalbea, manderangba nangrim-

bea. Matchurang, do·bokrang aro mesrangba nokprakon bang·bea. Wa·dingni giminsan kangal ong·sranga.

Anga sokangahaon, wa·ding dingpraknan matchu mangprak ka'e on·sekseke ra·angtokaia. Na·simangni angko chipchakgipa jenggeo wa·ding ding ritchasa dongani gimin angaba matchu mang richasakosan man·skaia. Da·oba uamang fenggeko wa·ding bing'e watenba bakbak bang'e ra·babo ine aganattokenga. Wa·ding ramram chitakode nangja ina. Anga bang·bea jenggerangko wate salgni salgitam mangni ja·mano re·bagen ine aganbara. Jengge ning'o nape re·angjao·de chiningni songona sokgija siaigen.

Ka·sara ripengrang, ang gita matchu bang'e man·bapana siktokode ang baksa re·tokbo, aro an·tangtangna wa·ding birge aro dal·dale jengge wattokbo. Ka·sapae angnaba ge·sa watpabo" ine aganon songgimikni manderangni ka·tong gisikrang jrongsrange, re·pana aro jenggerangko wattokna ku·rachakaha. Uamang noktangtangchi re·ange wa·ding birge jenggerangko an·tangtangna aro Tengtonnaba ge·sa wataha.

Pringo uamang cha·mân ringmano jengge tangtangko ra·e Tengton baksa chibimaona re·angtokaha. Chibimaon' sokon, jenggetangtangko

riting riting done, jenggetangtango naptokchina Tengton ge'etaha. Uamang jenggetangtango naptokahaon, Tengton sulsul kachepangtokaha. Kachepa bon'on, "Sawa skang re'angchengna ska?" ine Tengton sing'oa sakantian, "Anga skang, anga skang" ine agantokaha. "Ra, indide anga sulsul galatgen" ine Tengton aganenba pilakkon bon'en galattokaha. Da'nang, pilakan dos gri sitokaiaha.

"Da'ode angni bobilrang dongjajok; kusi ong'e tom'tome dongpana man'gnok" ine kusi ong'e Tengton songona re'baaha. Aro uni ja'mano nok gimikan matchu, wak doke, chu ringe, cha'e ringe kusi ong'aha. Indiba chibimao galat-ako man'e sianggipa manderangni jikdrang de-drangde grapari kalimani aro brangani ong'skaaha.

An'tangni aro gipinrangni duko ga'aknasi-enganiko naljokna dakgipa namgipa chalakki dakna change dakchakaniara nambegipa ong'achim. Indiba gimaatna, bon'atna dakgipa chalakkiara namen namgijani ong'a. Pilak kamon jola matjol dakna nangja.

MIKDO CHAWARI

Badiaba chel'gipa songsaoniko saksa me'trako rimange saksa pantena do'si do'doke on'aha.

Adita salrang jarang ru'utani ja'mano ua chawari panteara saksan niotang o'bite aro jikni ma'drangko grongpana re'baha. Ua chawari pantea walo walode mikdo ong'engachim. Wal andalsim ong'ahaon mrang mrangsa nikaiachim. Walsimsim dakahaon niotang o'biteni songona sokeaha. Jik dongna skangan o'biteni nokko ua nikangahachim.

Chawari pante niotang o'biteni nok ine napeoara uamangni matchu nolchinasa napangman'aha. Matchurang kene dongsiksake ga'gitikaha. "Da'alde matchurang mai ong'tokenga" ine jongsari wa'al nate re'ange nieoa, gumetangkosa nikeaha. "Maina gumede nokchi jamchi natchenggija matchu nolchisa napenga?" ine ua sing'eaha. "Nang'ma nang'pamang dal'a dal'a matchurangko ra'aha ine knasoani gimin badita dal'a dal'a matchurangko breaha, uko nipakjolenaga angade" ine gumetang aganaha.

Jongsarini wa'al teng'anichi matchu noloni ong'katbae uko ja'rike nokchina re'angpaora srappa uua nokkimachina napangmantaiaha. Unon ua sing'kamrango, kamrarango tingting tangtang chagake gam'attaiaha. Unoba jongsari wa'al ra'e re'angtaie nieaha. "Da'oba gumede nokkima-chisa napange chagak-cha tinge dongenga," ine aganaha. "Nang pamang dal'a dal'a singkamrang aro kamra damberangko on'e nokko rikaha ine knasoara bebe onga'ma aro badita jrima inesa ripee

niengachim," ine uni gumegipa aganchakaha. Gumetangko ua nokona dilangaha.

Nokni nokkraona napangon, wa'al namekai teng' jani gimin nokkrani noksikchinasa re'angtaimana-ha. Noksiko do'bima sa'dipil donakosa ga'pakea gita dakenba, do'bima ka'onange gangpakpake ja'pateo suaha. "Da'oba gumede noksikchi re'ange, do'bima sa'dipilchi suakosa man'enga" ine aganenba wa'al teng'e natataha. "Aimangni do'bimade bi'sa bang'e pe'atranga" ine nang'ni abi aganatanasa, badita bang'e do'bisa donga inesa nienga" ine gumegipa aganaha. An'tangni mikdo ong'e nikgijakode kratcha'e aganjaengachim.

Wa'al teng'ako man'e nokni gan'changona ga'katbae asongaha. Songni-nokni duk-sukrangko agangrike roaha. Do'o mangsa doke mi bijak song'mano chawari panteni sambaona cha'china ra'bae doneaha. Chawari panteni mi cha'mitingo menggoba re'bea sambao asonge dongeaha. Bijak enge cha'mitingo menggo be'enko kole cha'na dak-engachim. Chal'wari pantede uko nikjaengachim. Uko niotang nike, "Menggode bijakoniko be'enko kole cha'na am'engjok," ine aganataha. Unon chawari pante jakasichi dokbingbangatoara, an'tangna chi ringchina dongipa laukosa dokbikbakmane be'atsrangaha. Gipin lauosa chi rue on'ataiha. Adita cha'angon bijak bon'angani gimin niotang palgipinko enge sepango donatmitingo on-

tisa gam'ako knasring dake chawari pante, " Da-
oba mengkode be'en kole cha'taina amenga "
ine chanchie jakasichi krenge dokattaioa, da'nang
niotangkosa pakgitimo dokata gita nangeaha
" Aia " ine niotang chrikaha.

Niotangkosa menggo ine dokmaha ine uia-
haon ; mikgil kratchaako chakna amjae, ua rang-
san chakattimange noktangchina walgimik timing
timang ga'aktaitaie gitchiltaitaie kattimmanganga-
ha. Da'nang niotang o'bite, jongsari nosarirangde
mai ong'aha, uinan man'piljae, nitatgrike dong-
tokaiaha. Untaltalan chawari pante niotang
o'biteona re'bataimangjaha.

Bang'a manderang an'tangtangni uiani aro
changa sapanio pangchakaia. Mitamrang uiani,
changa sapani dongpajaoba senggipa changgipa
batgipa gita an'tangko mesokronga: Uandakgipa-
manderangko kamtangchin mesokaia. Aganme'apa
Noko wal'bima danengoba wal'tot totengpiti, A'a
gama bon'eba rama bakengpiti.

TOM·TOMANI

Changsao a'gilsako donggipa do'orang aro mat-
burungrang an'chinga maidakode jatsa jatgipin
Baksa aro ma'malsa ma'mal'gipinko nisigrikaniko

dakjana gita dal'bea chanchigrikaniko daktokna hai ine ku'monggrikaha. Iako dakna namnik-tokode mairongpile kusi ong'beani ong'genchim. Jatsara jatgipinna aro ma'malsara ma'mal gipinna mamung kengrikani dongjawachim.

Indaken uamang damsa biapo tom'dakenba chanchigrikna salko manchie donaha. Manchia sal sokon singho, mongma, matcha, mapil, do'gam-dot aro gipin gipin ma'malrang re'batoknie aganaha, "Hai an'chinga pilakan kom'kugipa ku'chilrangko gaitokna." Matcha mongmachiko nie aganaha, "An'ching pilakan ro'rogipa wagamrangko galtokna nanga." Mongma matchachiko nipile aganaha, "Ar'ching pilakan ja'skil-jakskil rangko gimatokatna nanga." Indaken gipin gipin ma'malrangba, ma'mal gipino donggipa silchidare-rangko galchina agantokaha.

Bon'kamao mapil budepa chakate aganaha "Ka'sara ripengrang, an'chinga saksa sakgipino donggipa silchidarerangko gimaattokchina ine agantoka agantokade. Indiba a'gilsak gimikan an'tangtangni silchidarerangkode galgija daktokenga." Unon pilak ma'malni jatrangan jripmitip dongtokaiaha. On'tisani ja'manon biap-tangtangchi re'bildangantokaha, chanchianiba dongjaha.

Ua gitan an'chingba gipinrangni doskosan

niktokaia. An·tangtangni doskode niktokja. An·tangni dosko janggilo dona. Gipinni doskode mikkango ra·bita.

NOKKOL GISIM

Badiaba song damsao man'e cha·gipa man-deo bregimin bang·bea nokkolrang gnangchim. Skangni salrangode me·asarang aro me·chik-rangko nokkolrangna palrongachim. Nokgiparang an·tangtangni nokkolrangko ka·sae jakkal-rongja. Cha·anirangko okkae on·rongja. Pring do·o gisikchengaoni walni askirang naaona king-king kamrangko ka·atrongachim.

Salsao man'e cha·gipa mande, pante bi·sa saksako nokkolna antio palako breenba nokona rimangaha. Ua pante bi·sara an·gisim ong·achim Do·ka manggisim gita dim·ak nangstipa gita dak-pilachim. Ua mandeo nangbakmanode, ma·gapna-susu nikpilachim. Ukode do·ka mandal ringa gita matchu noko gaa gita nikachim. Uko nike nokgipa agre moela bang·ani giminsa simenga ine aganaha. Uko name auatode rongtalgen ine chanchiaha. Indaken nokgipa nokkolrangko okame chirangko rite an·tangni mikkango uko auatchina ge·etaha.

Uni gimin nokkolrang chirangko ding'ate dah-gipa chi donchakaniko nokgipani mikkango don-eaha. Chirang krae ding'mano nokkol gisimko rimbae, chi donchakanio asongate chi ding'achi rubolbolaha. Sakgipin nokkolrang uni be'en gimikko rim'rokroksoaha. Indiba mamung rong-talbaanikon nikjaha. Nokgipa rong'pilengrangko ra'e nokkol panteni be'enko natchina ge'etaha. Indaken nokkolrang rong'pilengrangko ra'e nokkol panteni be'enko krenge natsiksikaha. Mitamrarg chi rubolbolaha. Da'nang nokkol panteni bigilrang skoktokenba an'chirang ong'katpile be'en gimikan gitchaktokaha. Uko nokgipa nike aganaha "De da'ode moelarang talangengjok, dontonggija bate bate natbo aro chikoba rubolbolatbo." In daken salgimik ong'nasipile auaton nokol pantede sisrangaha.

Atchikapgimin an'gilko aro gisikko mamung cholchiba dingtang cng'atna man'ja. Aganbe-wal gita matchuni bi'sa matchu, wakni bi'sa wak ong'aia.

MONGMA ARO MANDE

Song damsao mongmana kengijagipa mande dongachim. Changsao ua mandeni a'baoniko

mongma matte mangsa walantian mirangkocha'e-rongaha ine nikaha. Uko champengna gita ua chol mingsako dakaha. Ua mande megapko wal-minchi ba wal-bindi sake tarie donaha.

Meatam cha·mano wal·bindi tarie dongipao wa'al so'e a'ba a'seo timsoaha. Adita walangon mongma matte re'bae miko cha·etaiaha. Mande uko nike sriksrik maluangenba mongmani ki·meo su'site wal·bindichi mongmani ja'pakko so'aha. Mongma to'tro ong'e, mikoprete kataha. Mande-ba susitako watgija so'roroangaha. Indaken a'dok-sa ona sokangpilaha. Unon mande dontongna nangnike wa'alko spoe ching·atenba mongmani ki·seprao so'welwelenba, an'tangba sroksrok chok-onrikaha. Mongmade ta'raken katangaha. Ua sal dipetan mongma re'bataimangjaha. Maina ua gitchinangkambeaha.

Ka·dongachi bang'a namgnirangko man'a

MAPIL ARO MANDE

Changsao mande saksa an'tangni a'dalni mandal bol dal'gipani sambao ta'a e'ching aro' rasinko ge'engachim. Mapil-wak mangsa mandeko nik-ate mitino dongeaha. Mandede uko nikjachim.

Mapil mandeko rim'na mandal bolko gipaka gita dake jakotengako nikate rang'san mapilni jaksamprakchi rim'soe saldudete waldu ra'aha. Mapil chrikwelwelaha. Mandal bu'suni ka'bak gimikan matchrakaha. Mapil sikujana kingking mande ka'dinge saldudete roaha, ja'mano mapil sisrangaha.

An'tangtangna a'sel ong'nasion maiba joka-ni cholrangko dakna rang'san chanchiani gisik dongna nanga aro ka'dongna nanga.

MAKKRE ARO DO·MESAL

Badiaba burung bolgrim damsao makkre aro do·mesal gronggrike rona ine ku'mongaha.

Do·mesal makkrena aganaha, "Ma'nok na'a jagital ja'tengrako, te'gisim anggal so'o, angni nokchi roangpabone. "Makkre re'angna ku'ra-chakataha. Sal manchia sokon, makkre ma'nok do·mesalni nokchi re'angaha. Do·mesal ma'nok makkreko kusi ong'e nokchaksoaha.

Do·mesal mesal cha'angchina ine mi song'aha. Mi minmano bijak song'na ine sam'diko chiko rue chanataha. Do·mesal sam'dik rikingo

ba'e bitchi ronggni chi'ataha. Makkre uko nike gisiktango aiao inmanengachim. "Maikai ma'nok do'mesalde, ki'sangtanganiko gipok gipok rongtong rongtong dake ong'katatna man'asai? Da'mo angaba ambino ma'nok do'mesalna dake on'pagen" ine makkre gisiktango chanchiaha.

Do'chi minahaon, mi cha'china do'mesal makkrena tarie on'aha. Makkre do'chiko cha'e nion tonikbeaha. Maina atchiantaltal ua do'chiko cha'e nikpakujachim. Un salo makkre oknageng dakpile cha'pretaha. Cha'man ringmano makkre do'mesalko mitele aganaha, "Ma'nok, na'aba basakoba changsamang rona re'angpabo. "Makkre noktangchina re'angpilaha.

Sal soko'a do'mesal ma'nok makkreni nokchi re'angsakaaha. Makkre do'mesalko niksoe kusi ong'beaha. Makkre do'mesalna mesal song'aha. Mi minahaon, bijak song'na me'diko chiko rue chanataha. Chi ding'ahaon do'mesal gita sam'dik rikingo asonge bitchi chi'atpana ine ua asongaha. Bitchi chi'atna dake nipaon man'jae be'en gimikko asongatoa, ki'sangsa chi ding'ao asongbeka gita dakenba, ki'sang gimikan chibiltokaha. Makkre an'tangba chrikwelwele dongaiaha. Do'mesalde cha'a-ringa gri noktangona re'bapilaiaha. Indakesa makkrerangni ki'sangranga gitcak gitcak daka ine aganronga.

Chanchibewalgija gipinni dakako nike dak-paina nangja. Indake dakgipakon "Jola matjol" ine agana.

JANIANI.

Skang chasongni salrango mande saksa anti cha'e songona re'bapilmitingo ramao janera be'ate galako nikaha. Uni dal'ara jakpasamang apalachim. Ua mande uko kole niaha, unon ua an'tangni mikkang bimangko nikaha. Indiba ua an'tangni mikkang ine uijachim. Uara pangnaba janerako nikkuja aro aganakoba knakujachim. Ua mande mikkangtangko nike jagoke aganaha, "Aiao! Apa sagia ianosa nape dongenga da'nang Ru'utbea bilsina nang'ko nikjahachim. Maikaisa iano nape dongengjok na'ara? Ama sagi banosa dongenga?" ine sing'aha. Ku'sikde ku'gap-para ku'rangde dongjani gimin aiao inmanengachim.

Ua uko ra'ange depante namchiktangna aganmesokgija ba'ra surichi remreme Sunduk (bakso) surio chipe donuaha. Bilsignimangna depante aro namchiktang baksa dongani ja'mano ua siangaha. Pagipa siani ja'mano depante sunduk suriko oe niaha. Uno ba'ra surichi remreme don-

gipana agre mamungba dongjachim. Ua uko ra'e ba'ra suriko enge galenba nioara, an'tangni mikkangkosa nikaha. Indiba ua an'tangni mikkangkosa nika ine chanchijachim. Maina ua mamung saloba an'tangni mikkangkosa nikkujachim. Ua an'tangni pagipa sagikosa nikaha ine chanchiaha, 'Ha gose ! an'tangko ba'ra surichi remreme an.. tang sunduk suriosa nape dengenga da'nang, maina indita salna ru'ute dongnua apa" ine depante grape aganaha. Ki'sikde ku'gap ku'gap daka, indiba ku'rangde dongjachim. Depante pilni pil agangrikbeoba, aganchakako man'jani gimin ba'ra surion remreme donpilaha. Un salo uni jikgipa noko dongjachim. Ua uni gimin jiktangnaba aganjachim. Ua jikgipani noko dongjamiting somoirangosa janerako bikote nienba agangrikrongachim.

Salsao segipa janerako nie agangrikhemiting o jikgipa nokona re'bae knadikeaha. " Da'alde angni segipade dokdringo sanbaksa agangrikengabia " ine sriksrik re'angenba nieao, janerako mikkang dingding rim'e niengako segipani pakkre dingding niatoa jikgipaba an'tangni mikkangkosa nikatpaaha. Indiba pangnaba uaba an'tangni mikkangkosa nikpakujani gimin sakgipin me'chik baksa agangrike roenga ine segipako potaha. Indaken jikgipa rang'san janerako ra'brote niskae, " Ia sakgipin me'chik baksa roesa na'ara angni dongjamit-

ingo pangnan kusi ong'e golpo ka'e rorongako da'-
 alsa rim' na man'aha " ine segipako saiaha. Segipa
 aganaha " Anga sakgipin me'chik baksa mikcha-
 nangrimgrike agangrikenga ong'ja. Indiba angni
 apa sagi baksasa agangrike ropaenga". Indiba jik-
 gipa bebe ra'jachim. Jikgipa janerako nitaie agan-
 aha. " Niboching iara sakgipin me'chik ong'jama?
 Na'a maina jechakenga." Segipa janerako ra'seke
 niskaenba aganaha, " Bao da'oa, me'chikara, Apa
 sagisajama? Maina na'a ong'gija angko amitram-
 ramenga." Indaken uamang matchotgija jegrik-
 engako uamangni noksul knaenba re'bae sing'eaha.
 " Maini gimin na'simang jegrikani ong'enga? "
 Uamang jiksesa je'grikako dontonge sakprakan
 noksulni mandena janerako mesoke tale agane
 on'tokaha.

Noksulni mande uamangni obostako uienba
 ka'dingsmite aganaba. " Ripengrang, banoniko
 na'a nang'pa sagiko aro na'a banoniko me'chik
 gipinko nikaha." Segipa janerako ra'e noksulna
 on'e aganaha. " Iano apa sagi dongenga."
 Noksul janerako ra'e nie aganaha, " Iano nang'pa
 sagi dongja. Na'a nang'pa sagini bimangkgo ra'ani
 giminsa nang'pa sagi gita an'tangko nika."
 Jikgipaba aganaha, " uanon uni mikchagipa me-
 chikba donga." Noksul me'chikko okamenba
 aganaha, " Iano sakgipin me'chik dongja, na'asa
 an'tangni mikkangko nikskaa. Da'o an'ching sak-

gitam janerako nidimna hai." Indake nidimon uamang sak gitamni mikkang bimangko nikdimaha. Noksul uamangna tale agane on'aha. Uamang jiksese name tale ma'sisrangahaon, an'tangtangni dakgimin kamrangko chanchie ka'dingbeaha.

Ma'sigija kamrangko dake aro kratcha'ani-rangko an'tangtangna ra'baronga. Indaka kamkon "Jabitchimo ba'a, Jaminoko dina" ine agan-ronga.

J A R I N G A

Mande saro sajo dake ram'sisi-ram'deng-denga, ua mande jumang jakarichi walantin si-anggimin ma'drangrang baksa bagipin songo dongenggipa ma'drang aro gipin gipin ripengskarang baksa rojringronga. Indake saronggipa mandeko nokoni adita chel'a biapo sambasie, ua ro-branggipa jama janggiko re'bapilchina okame krita.

Ja'mano kritram biaponi sagipani nokjat-chiona kilding sringange re'chu ansogipa (e'sal ansoa) dingdingo kimbalni (makanchi bol) bijakko jakgnimang kadee dona. Ua re'chu ansogipao merong aro gipin gipin cha'anirangko donsoa. Unon kamal asonge rokom rokom kattarangko agane, ua sagipa mandeni jama-janggiko okama. Indakmitingo chibrim, karo aro gipin gipin jo'ong-

rang re'bae cha'eode, ukon sagipa mandeni jama janggi re'bapiljok cha'ejok saa namginok ine kamal agana.

Ukon jaringa (jama-janggiko rimbapila) minga. A'chikrango rokom rokom bebe ra'e dakani kamrang bang'a.

J A B A A

A'chik manderang indake dakronga. Maharioni mama ada ba ma'drang siode, uni nokona re'bae mangko so'e galmano gipin gipin dakna nanggni kamrangko daka. Songtangchi re'angpil-on, sianggipani jakkalanggipa ba'ra, chola aro gipin gipin bosturangoni mingsasiksikko ra'e debra stite nogipa abitang ba namchiktang kamdak ong-giparang ba'e ra'angronga. Rama brangjachina ine chiring bachibimarangko kilding sringbate don-anga. Sigipani nokoni ba'e re'chakatangon minge chenge grappropoesa re'angronga.

Indake dakani miksongara uamangni mama ada aro jongni jama janggirang gipin mahario at-chijachina ine jama-janggiko ba'e ra'angpila ina. Uko 'Ja Ba'a' ba 'Debra Ba'a' minga.

B I M U N G

A'chikrang simanoba atchitaia ine bebe ra'-ani gnang. Unigimin maharitantangoni siang-giminrangko gipin mahario atchi dongnapatna sikja. Indaken mama-ada, atchu-ambi, made-ma'jong aro jong-no sianggiminni bimungrangko maharitantangon chasongni chasongna mingrik-rikkironga. Sianggiminni bimungrangkoba gipin maharirangna mingna on'rongja. Gipin mahario mingode melae dai cha'ronga.

Indaken skangni chasongode A'chikrang bimungrangni gimin namen gamchate rakkironga.

MANGONA BA MANGROA

Ia mangona ba mangroakoba A'chikrangde namen manironga. Pilak jolrangon dingtang dingtang manianirangko dakronga. Joltangni manianiko iano kan'dike sea.

Sianggipa mandeni manggisiko saratangen ganchi rike so'a. So'ani pring gipino grengko kolamo chokkrekk watenba nokjatchio ba maljurio songenba grengko dona . Uko bang'a sal ba jarangna rakkie pring atam cha'aniko aro ringaniko

on·tiprak on·ronga. Merong me·churangko chim-
onge, churangko songdame, wak matchurangko
chimonga.

Sal manchia sokahaon maharirang aro gip-
in nangchappipa bakdrangrang chu olbae, merong
mechu ra·bae, wak matchu mobae, sigipani nokona
re·batoka. Unon matchu wak doke mi·bijak song·e
cha·e ringe, dama-dachi, rang-kram doke, bang-
si sike chrok-mesae an·senge roa. Un salosa chok-
krekonni grengko ra·one, ba·ra debra gitalchi no-
gipa ba abitang ba namchiktang ba·e grape nok-
ningo aro sarao rodila. Ukon 'Mangona' ba
'Mangroa' minga.

Pilak kamrangko matchotmanosa me·dik gitalo
grengko done nokmikkango gope dona. ukon
'Krom' minga. Nokmikkango bolrangko bimang
sol·e-repe aro sigipani jakkalgipa bosturangko
donchapa. ukon 'Kim-a' ba 'Kima songa' ine
minga uan gisik ra·ani chin ong·a.

NA·A BEBE RA·AMA ?

Salsao mande saksa e·sal akna a·brichi re-
angaha. Ua te·rik bipangko den·pee akengachim.
Mupil-wak mangsa mandeko nikate sruk sruk
malubaaha. Mandeni sepangona sokoa mapil

chadenge jak bawange mikoprete chagropaha. Mande rang'san bamgopaha. Mapil mandeko man'gija chikarechina chu'sikkopa gita ga'akeaha. Unon mande bakan mapilni janggilo bilondape nachil samgnio rim'e su'kimkimaha. Salgimik su'kimkimen atamchibara mapil siaha.

A'sel ong'on an' tangko rang'san naljokatani gisik dongna nanga. Na'aba ka'donggenma?

—Changsao mande saksa wa'ding den'na ine a'brichi re'angaha. Wa'nok grimona re'ange ua wa'a namako niroroangaha. A'chikkode nina simsakjaha. Indaken ua grimkolchi ga'aksruangaha. Indiba ua mande mamung dukkoba man'jaha. Ua a'palona ong'katbana mamung chol dongjaha. Ua an'tangko sigiminsajok ine chanchie duk ong'bee sinti do 'pilgime dongaiaha. Ua a'kolara andalbeachim. Indiba kosakchide mrang mrang seng'ako nikatachim.

Sal napangahaon ua grimkolo turonggipa mapilwak mangsa tuna ine ki'sangko grimkolchi ki'sangate malonbaengachim. Mande uko niksoe rang'san bilchroke mapilni ja'a samgniko rim'soaha. Mapil jagoke rang'san maldopilaha. Mande-ba watgijan mapilni ja'o rim'e jenten a'palona sokbaha. Mande mapilni ja'ako rim'ako wattimbangataha. Mapil nipil-nichagijan tingbang katangaha.

Mande namen kusi ong'beaha. Ua mapilni katangako nirike ka'dingrikbeaha.

Basakoba basakoba duko ga'akoba jokani chol-rangko man'ronga. Na'aba ua gita dakpana ka'donggenma ?

GIPIN KATTARANG

Mandeko mongma dokode (Rong'ma romto-jeta ba balwa paka) minga. Mandeko matcha chikode (Jawa daka, do'reng bala aro chipaka) minga. Matcha chikchakram ba mongma dokram biapko (kam ram ba sikram) minga. Indak-gipa maiba maiba kenani biaprang dongode (A'kim raka) ine aganronga. Matcha chika man'gipa pilak jakkalani bosturangko galram biapkon (Dinna galram) minga. Mande siani ja'mano uni noko rokom rokom dake kal'akrongode (Jaraka) minga. Sigimin mandeni manggisi dal'rorobae bimang dingtang ong'ode (Mangchaa ba nawang chaa) minga. Ma'drang ba gipin manderangni siango sipaode ukon (mangrepaka ba jadina) minga. Bilongbee sagipa mande on'tisa namkale asonge niwate sagipa mandekon (A'song chiga niwata) ine minga. Songo noko matcha chikode, mongma

dokode ba maiba dal·bea a·sel ong·ode, songgimikan noko dongtokaia ukon (Salnima) minga. Songre songgabato merong we·rasa, we·ragni (ko·ma) dake a·angronga, ukon (Rongajanggi) minga Mande mikdo nangode, do·o koksepo maiba maiba bost·urangko chipenba songjoljol do·o palenga ra·gen ma, do·o palenga ra·genma ine aganjojoanga. Unon saoba nina sepangona re·bae niode, “O, da·ode angni mikdo nang·chisajok ’ ine aganenba do·o koksepko mik·kango galbrakenba nipil nichagija katanga. Indake dakode mikdo nama ine bebe ra·a. Mande bachi·naba re·chakatangon jakrani ja·a ja·gitotode, maiba a·sel ong·gniko mesoksoa. Indakode re·taina nangjaha. Re·chongmotna nangoba dikdiksa dongani ja·manosa re·taina nanga ine bebe ra·a. Jakasini ja·a ja·gitotode gipinsa an·tangnade ong·ja ine bebe ra·a. Mama adarang chawari re·angode jonggrirang uamangni ba·ra kancha·rangko ba ampakko me·chikni nokona boe ra·angronga. Uamangna mama adarang do·oko on·atskana nanga. Ukon ‘Do·simpak cha·a’ ine minga.

A·chikrangni bewalo pante aro gachi brin·bawe ba·ra·kancharangko ganrong chinrongja. Pante gachini ba·rarangko gano·chinode so·mal nanga. Unon panteoniko do·oko rim·drae ra·angronga. Uandaken gachiba panteni ba·ra

kancharangko gano-chinode apsan doso ga'aka. Gachi nappgimin mande noktango bangsi sike rona man'ja. Bangsi sikode ukoba do'bangsi cha'ronga.

Jong-grirangni nokchi mama-adarang re'angode uamangko mande ra'e, birong chane chu cheke, wak doke on'soronga. Indiba uamang cha'gija ringgija dake dongaia. uamangna tangka on'chengna nanga. ukon 'Gitok chika' ine minga. On'manosa cha'a ringa. Cha'gija ringgija dongakon 'Gitok nima' ine minga.

RANGRUPA

Badiaba song damsao Rangrupa ine derabitgipa me'apa saksa dongachim. Salsao ua an'tangni songoni adita chel'kalgipa songona rona re'angaha. Ua songo adita chuko ringe, ripengskarangmung adita bel'bele roaha.

Adita walangahaon Rangrupa bil'cham so'e nate songtangona re'bapilengachim. Ua songtangni mande gopram so'ram biapko re'pakna nangachim. Ua gopram biapona sepangahaon uni natgipa bilchamni wa'alba ka'sne ka'sne dim'elroorangaha. Me'mang saksa uko gronge,

biap damsaona rimangaha. Ua biapara namen rongtalachim. Ua biapo banga sigimin manderang tom'dake asongtokengachim.

Rangrupa ua sigimin manderangko uitokachim. Bang'ani bimungrangkon mingna man'achim. Maina uamanga songtangni manderara ong'tokachim. Nammiting salrango uamang bak-san roachim aro kamrangko ka'rimachim. Ua biapona Rangrupa sokbaon, bang'a sigimin manderang a'koltangtangchi re'batokaha, aro Rangrupako dongdule asongtokaha.

Uamang Rangrupako chrokchina ge'etaha. Chakchikna man'jae Rangrupa chrokaha. Unon uamang apan jakpa doke git ring'aha—

“ Tim-tim echok timechok
Da'o re'bagipade korongchok,
Tim-timechok timechok,
Da'o chrokgipade kodarok ”

ine jinma ku'si ong'e jakpa doke wal tong'saona kingking chrokataha. Uamangni ring'a gitan Rangrupara kodarok dakachim. Me mangrangni domgramranga rongtalbeachim.

Ja'mano uamang Rangrupako noktangchina re'angna man'gen ine aganaha. Watako man'e Rangrupa re'bae nokona sokgija a'pal a'seo tusie pring seng'osa mikrake nokona re'angaha. Ua

pilak ong·gimin a'selrangko jikna dena aro ripeng-skarangna aganaha. Ua nokni manderangna mamung a'sel ong·jaha.

Bang·bata manderang, mande-gopram, so·ram aro maiba a'selni gimin songko nokko gale kat-gimin biaprangko saloba waloba re·pakna ken-ronga. Gilja noknaba walo re·pakna kengipa manderangba donga. Maina bang·a gilja nok-rangona sigimin manderangko ra·nape gilja ka-chengesa gopranga. Indaka biaprango kal·akako man·ronga ine aganronga. Na·aba kenpaama?

DEBRA SU·GALA

Ma·a paarang bi·satangtangna sok kane, mi du·e, ja·pingko bolgong chane, jaksiko ki·gol dake aldua mittanga. Saa ding·ani salrango walo tusinapgija ,salo dongnappilgija samra sampile sana bana. Indakesa ma·a pa·arang dedrangko ja·del bolchaata. Uni gimin depante demechikrang ma·a paarangna dal·bea dai ba gro donga.

Pante soke bilsok jaksokahaon, jik kime gipin a'songo dongani ja·mano adita chakal ringkalode an·tangko ba·gipa chi·gipa ma·a paa aro jongdrang nodrangko aro mahariko noktangona okamattoke

matchu wak doke chu ringe, mi cha'e, chrok me'sae dal'a alaniko daka. Ma'a paana matchu ba wak ja'pingko on'ata.

Indake dakan ma'a pa'ani ba'e dal'atani groko chota aro ukon " Debra su'gale gala " ba " Debra su'gala" minga.

Ia dakbewalko pilak bakrangon daka indake ong'ja, indiba gipin gipin biaprang ba jolrango dakani dingtang ong'a. Depanterang chawari nape siangode, sigipani nokoniko selu mil'am chola ba'kotipko ma'a paa ba nodrang sandie an'tangtang nokona re'bae dona.

Saoba jongska adatangrang debra su'galpana chol ong'pajaode, ringe cha'e pekan salo jegrike saigrikani ong'ode " Na'ara anggita ma'a paa-na debra su'galpaama " ine janapenba saigrikronga.

RENGGOK

Renggok adita nitogipa do'o ong'a—ja'bandika, sko nitoa aro skoni kosako on'tisa chutinge a'patal daka. Ku'chil ro'a kosakni ku'chil ro'bate kom'kua, ku'gopgop dake mangraka. A'chik songni bang'a biaprangon renggok donga. Indiba nikbreja, maina ua jelgipa jat ong'ja.

Renggokrang bitchi chi'kari ong'ahaon chugipa bolni bolkolko am'e uno bitip dake bitchi chi'ronga. Renggok bima bitchi chi'na bolkolo napahaon, bobilna kenchake renggok bipa bolkolni ku'mang gimikko on'tisa a'kol donari stapgipa astechi repie donronga.

Renggok bipa salantian cha'anirangko bal-baenba dongimin a'kol gita bimana on'atranga. Angke ja'si be'ode, guk jo'ongrangni ja'si chotako ra'baode renggok bima ka'onange cha'rongja ine agana. Maina segipa gipin do'orang baksa mik-chae nangrime kusi ong'e kal'grikesa angke ja'si de'epa, guk jo'ongrang ja'si chota ine amitsoana. Mongsongbate me'kin bitchi ringronggipa reng-rengpak minggipa chongipa do'ona amitrongbata ine agana.

Renggok bimani bitchi chi'na a'bachengaoni bi'sa pe'ani antignimangona ma'a aro bi'sarangna renggok bipa alduna nanga. Bi'sa pe'ani anti gitammangni ja' mano renggok bima a'kol repigip-ako su'pongo ong'kata. Bi'sarang bilakkujana kingking bobilna kenchake on'tisaba a'kolko done repitaie dona.

Bima bipa salanti bi'sarangna cha'aniko aldua. Bi'sarang bilakahaon ma'a paa a'kolko su'ponge uarangko rimongkata. Basakoba basakoba bi'mani bolkol ning'o bammitingo maiba a'selo

ga·ake bipa siani ong·oba, bima aro bi·sarang sina nangaingnok ine chanchinaba donga, indiba indake ong·ja; manggipin renggok bipa re·bae sigimin renggok bipani pal dakna nanggnirangko dakeskara ine aganronga.

Kamrangko ontisaba ka·pagija cha·mangmangari roaigipa me·chikkon “Renggok bima” ine agaronga.

DO·BAKCHIL.

Skangni chasongo me·chikma saksa asongna rakbaenggipa bi·sako ba·e, burung bolgrimchi am·bol am·na re·angaha. Bolgrimona soke am·bol am·angon uni sepangbeaoni do·bakchil mangsa bilange ontisa chel·kalao onchokaha. “Ia do·ode ja·a sae bilna man·brejaenga. Bi·sa kalake rona namgen” ine agane ua uko rikangaha. Unoba do·o ontisa bile gop, aro rikangtaioba ontisa bilen gop dake onchokaiachim. Ua mande do·bakchilni bewalkon uikuja aro nikkujachim. Indaken ua am·bol amna nangakode gualpile do·oko rikroraangaha. Rim·na dakoara soknagitikgitik dakon do·o bile kataiachim.

“Da·mo nang·ko, man·jana kingking rike nigen” ine agane gong·rake rikn manna gita ua bi·sako

ba'aoniko enge uko asongate donangenba atte ra'e rikroroangaha. Ua uko rimna dako man'srangja, ja'chi ga'pretna am'oba soksrangja dakaiaachim. Do'bakchil on'tiprakprak bilari onchokro-roaiachim. Una ka'oksie rikangoa da'nang ua detangkode gualpilaha. Indaken a'doksni ga'bate, chiringsni batsote sal gimik rikahaoba ua uko man'jaha.

Ja'mano ua detangko gisik ra'e graprroe am'rorobaoba uko nikjaha. Badia biapon ua detangko asongate donbaachim ua biapkon ua uijapilaha. Da'nang ua do'bakchilkoba man'jajok, aro detangkoba nikpiljajok. Ua do'okon do'bakchil ba do'bak alsia minga. Ua do'oni bewalko uijaode banga manderangkon togironga.

Indaka kamkon, "Matma skoko done ang'ke kinoka ba milsi pia" ine agana.

NOKMA SONGA

Badiaba badiaba jolrango adita cha'kal-ringkalgipa mande songo dongode, uni jikni chra angderang re'bagrime nokma songna melagrima. Saobara matchu on'gen, saobara wak on'gen, saobara merong-mechu aro chu on'gen ine chra angde-

rangan ku·rachakdingdange ra·angtoka. Nokma daknasigipa ku·rachakode, ua sal intalan ba·ra a·sim ingipako pangnan chingopjringna nanga. Ukon “Gana pe·a ” minga.

Antigni antigitammangna wak, matchu, merong-mechu, me·su·samjak, am·bol·e·sal aro churangko chimonga. Chel·ao aro sepango donggipa maharirang aro jakra jakasini bakdrangrang merong ra·bae, chu ole re·batoka. Salantian jamoniko mi bikote rame, mi su·gipa mi su·e, mi song·gipa mi song·e cha·gipa cha·a, ringgipa ringa. Su·gipa kimko kimko aro song·gipa kamseng dakpila Do·mandal bitchi ringa gita jikjak jikjak, bija chiraa gita wen·wan wen·wan dake nikpilaiachim.

Ku·manchia sal sokbaon aro pilakchinin mandarang sokgrimbatokahaon matchu wak chimongsogiminrangko doke, so·e ratgipa ratgen, song·gipa song·gen cha gipa cha·gen aro chu kangipa chu kangen. Ringgipa ringen, pekgipa pekgen, kore dokgipa dokgen aro dorigipa dorigen. Unon nokmani sa·rao wa·ge den·e kilarangko kadetoke songgen. Ukon “Tilta ” songa minga. Ua tilta songgiminko nokmaskarang duule sepi aro daniltangtangko skoo itchiltoke re·wilwile chrokmesatoka. Adita chrokangon, mitam nokmarang ja·a saa, ja·sku neng·a kang·kare sing·kambe saeng a ine rokom rokom agane chrokgija asonggope donga daktoka. Nokma' gital ong·nasigipa ua-

mang sakpraknan tangka kapprak on tokna nanga. Indake dakakon " Gitok nima " minga Tangkako man tokahaode uamang chrokangtoktaipilgen.

Nokma gital ong nasigipako jaksil ganatna skang uni nogipa ba namchiktang kam dak dakgipasa uko ja ping sepdape to pilate kni chitat chenga. Uni ja manosa uni chratang dal batgipa jaksil manggol ra bae knatogija katarangchi saichengenba nokma ong nasienggipa mandeni jakgitokko sale. " Ha nokma jaksil gan " ine agane Ukoba oke galpilenba " Ganja, nokmaba dakja ' ine okpile galata. Uko ta taipile ganataia. Jakgitok samtangtangan ganata skonara ba ra marang kotipko kaata.

Unsal intalan uko nokma minga aro mande ra'a.

SAA RIKA BA BANG RIKA

(A'CHIKNI BEBE RA'ANI)

Songo noko mariki ba ugita gipin rokom saaniko man'e manderang siangode ranggolko mangsa so'ote uko nokantiona saljojoe nokkraoni a'bachenge ranggolko nok gimik saljojoange nokgilona salange ong katea. Do'gacholantion mande-

rang go'olrangko ra'e dongsoenba saa ding'ani-rangko janape uko doksotoka. Songgimikni nok-rang bon'kujana kingkng apsanana dakanga.

Songgimikni nokrango indake dakmanahaon ranggolko chisol dake kapakkrangenba ramao song'e dona. Ranggolni kokimao wa'arangko petchokattoke wa'cholrongko chake dontoka. Uni sambarango cha'sam, rimol, ruan, kok, gitчера, kokcheng aro gipin gipin surirangko bolrangko kakape dontoka. Indake daka kamkon songni nokni saarangko a'rike gala ba "Saa rika ba Bang rika" minga.

—Meatam cha'na skang ja gital naako nik-ode okgimu chaka ine bebera'a.

—Jajong gital gitcinge naode, 'Wachi so'ola ba mikka waa" indiba ra'chakenga gita naode, 'Wachi ra'chaka ba mikka wabrejava.

—Do'biparangni gisikbewal ong'gija atamo ba walo gisikode songo noko maiba a'sel ong'a. Ua gisikgipa do'oko so'ote skoko ku'sikko ku'angate go'olo sikkroke ramao songdoe dona.

—Te'rik ba maiba cha'ani biterang apek ba jonja dakako me'chikrang cha'malja. Cha'ode de jonja ba'a. Uandaken panni bijakkoba cha'ja.

—Mande bi'sarang ong'anaba ong'janaba grap-sirongode an'tangnaba ba ma'a paana namja.

—Do'reng do'karang ba soginrang bolni bi-chonggrimo bitip dake sa'ode balwa ta'rakkan ong'gen, indiba bolrikeo bitip ra'e sa'ode balwa ta'rakkani ong'jawa. Maina do'reng-do'karang balwani ma'ako ma'nok dake bilsiantin uamango singchengronga aro uamangni aganata gitasa uamangba dakronga.

—Achak grapsie mikorongode ba sintirongode ua nokna maiba a'sel ong'gniko mesoksoenga ine bebe ra'a.

—Ma'a paarang depanterangni chawari nape ma'a paani nokoni re'angon ma'a paa ka'sae matchu matteko on'atode ukon' "Doka wata ba gitang on'a" minga. Indiba matchu ba wakko so'ote be'enko on'atode "Gisi on'a" minga.

DO·SI DO·DOKAO MINGANI

Poi, na'a Sorin ba'ara, Soran neng'ara. Grimchini ba'ara. Bacharini neng'ara Nang'ni bibibik, nang' bikachi nang' bimang, nang' bichangchi, anga uni bingnamna, chuman pangmanna kal'grikgenne, kim'grikgenne inode, mite kakket napkete, mande kakket napsike namboi.

Ka'galwatgne inode ina, kim'bipakgne inode, do'bik ginggengboi ne, childarengboi. Anga

kugangne inode, nangmana nang ' kurina, nang-
pana, nang, mikkimna, na'a ku'aganebo, na'a ku-
mesokebo, na'a atchitaibone, na'a rongnaptaibo.
Na'a bitchi chiebo, na'a bi'sa piebo. Na'a jelsuae-
bo, na'a jelbraebo. Nang-na delangsoenga, nang-
na domiksoenga.

Uchin atchisikebo, uchin rongnapaebone. Uno
gimin cha'ebbo, uno sa'ra roebo. Na'a do'ma
gitchuko, na'a rangsi tasiko ja'chimgatingaibo, ku-
chi sudingaibo ne. Angna ku'aganangja inede,
ku'mesokangja inode, samaropo cha'boi, me'ga
dopo timboi, mai kusisiasa, mai ku'mitingasa, Tu-
ara Nangapan Sawepang mandinin, ang' bibik
ang' bikachi ang' bimang, ang' bichangchi,
mni janggi tangachim, meja jama namachim inon
namkutokbo namchipbo, namchri namjanggipbo.
Do'bik anchi grisai ja'bak bagi grisai inon.

Do'o bima bipako dokenba bibikko ra'e nie aro
wakkitkoba nie doro ra'china aganaha. Do'bi-
pa gingmat naako mangsa aro dobima miksik tang-
ako mangsa rim'e kamal me'a aro me'chikni ba'rao
donrime spoe do'siako bon'ata.

DO·SIMAO DORO RIN·GANI

Mni a'an gaango chipaka,
Meja chin mitapo chikinga.
Ma'gipako Jengjini Jengjina,
Pagipako Sengjri Sengjra.
Okstena uija,
Gandurian rongtalja.
Tusidimuaia mikgilrimuaia
A'song choknokaia,
Dengdeng matchokaia.
Uko pepo mamasa,
Uko miktim adasa ;
A'an grang oako nike,
Katchi jal'ang chanako ma'sie
Gororie kal'bara,
Akatie robara.
Bitkisike donbara
Danok done kalbara
Un ' gogoriako, un' akadiako nike,
Mni tasi a'ningsa ;
Meja manta chiningsa,
Tilerang matchako Dokrang Imchi
Re'grong renamsange,
Cha'rim rime rosoa ;
Sikmitale kal'soa.
Unon jaktuatangjok,
Unon jaksangwalangjok.
Un ' jaktuatako,

Un ' jaksangwalako
Binnasi abisasa,
Gangasi ma·desasa
Nobarike rosoa,
Nodongdile kal'soa.
Unon bijak bengraru,
Unon ja·ping boltolu,
Unon bigong dugrak,
Unon kambe gonggitchak ;
unon chasing chanajok,
unon mikrit tamsujok.
Tuara a·ako wene,
Nang·para chiko pane ;
Ja·gitdoe nikangjok,
Totipile man·angjok.
Uko dokdu simchio,
Uko biksot jateo rae.
Tuarana peksane ;
Nang·pana ge'sane,
Uko peksualangjok,
uko pekraronangjok.
Tuarani dikeko,
Nang·pani nangdiko,
Anga chikpinekgenne,
Anga chakrimgenne
Ang ' ku'an munni,
Ang ' ku·chin chambunni.
Ang ' wanga wagamna,
Ang ' dudu chompana ongne ;

Ruakolna ongne,
Pusingsolna pigne.
Abet Rangge nabane,
Chiring chisik nabane.
Anga waku warengnabe,
Chipu a'ningnabane.
Waku burungnabane,
Dram mite nabane ;
Saljam pante nabane ;
A'aonina rikitna
Chionina premna,
Mamarekitnabe,
Tingting majaneniba,
Sagindena sajorina,
Sajorina baljorina.
Pakmao re'gipanaba,
Damdil senggipanaba,
Bekku sugipanaba,
Patchal pekinggipanaba,
Anga onmrigenne,
Anga prmrigenne,
Jaktuatangpachina,
Jaksangwalangpachina
Tultual dakchina,
Imba imbirongchina.

ME·CHIKNI MAHARINI DOROANI

Meenpa ringreng ringreng,
Rongdingpa gingen gingen,
An·cheng sare re·ana,
Wari baljejeana,
Dingbrengtojana,
Ja·similtojana,
Racha wari nakjok,
Rade pante nakjokai.
Puako aringgako,
Pusilko chipangako,
Ja·skil silchi sike,
Mikron do·me sone,
A·song makku koreo ba·ako
Chiga saling dareo neng·ako.
A·bri mebandeo gokgoke rochina
Ranggure nokpanteo tengtengai kal·china
An·cheng ritchapachina,
Wari kontupachina.
A·ni bata a·chuo,
Bolni bata bolchuo.
Gisikwatako knae
Roe salako masie.
Chame dirang patana,
Ki·me gongot 'gongotna.
Ka·a me·katchi ka·gnok,
Nala watesao chipgnok.
Agrang kae jilgnok,

Samtom watom on'gnok.
Rongma ranggu mongjilma grimo,
Rongruai jilako
Bolma gring rongsilma chiringo,
Rongtekai patako.
Gring gatitie jolja sara dechina,
Kaja nipanakachim ;
Beri dengpanakachim.
Du'me achok chaange jillana,
Kiting gipok naange patana.
Bipa gisik watana,
Chara ape chaana.
A'song ka'sinana,
Chiga rongdimangana.
A'bri mebandeo,
Ranggure nokpanteo
Rongruai jilpana,
Rongtekai patpana.
Sreng gisikwatchina,
Ruram apechachin.
Asong adingpachina,
Chika balchapachina.
Pura miksik cha'china,
Ginde wagam nichina.
Samtom ga'chichina,
Kindik su'chichichina.

ME·ASANI MAHARI DOROSKAANI

Rongruai jillade jilla,
Rongtekai patade pata.
Do·me achok chaade chaa,
Kiting gipok naade naa.
Na·a kajaniangbo,
Bedi beridingbo.
A·keon amatjane,
Ikgilon kutangjane.
Grongan a·mang nangja,
Ki·mean samte nangja.
Wa·se besa ka·aia,
Dalne mejolpaia.
Gringde gring gatititgenne,
Bipa do·regipusa ne,
Sreng gisikwatjawa,
Ruram roe saljawa.
Kindik su·tiktikjawa.
Samtom ga·britbritjawa.
Pura miksik cha·jawane,
Ginde wagam nijawane
A·song adingatjawa,
Chiga balchaaljawa.
Pringo gisikwatjawa,
Atamo nolniningjawa.
Do·reng do·ka nijawane,
Sadil rodilpajawane.
Kingkang doksoaibo,

Kari nongsobalko alaibo.
Silchi sike doktaibo,
Wiltaitai jakkale nibo.
Atam pring simchi rim·rokaibo
Pring atam doktoptopaibo.

ME·CHIKNI MAHARINI DOROATANI

A·bil agal jingjalo,
Asim tara patalo,
Ina atip rikenga ;
Badi mul songenga.
Atip su·tiktikenga,
Mul gajipjipenga.
Atte ketal dokenga inana.
Rua sambal ruenga inana
Ra·gitdoe donenga inana,
Wilgate potenga inana.
Sara samsi dikana.
Nokgil sawil weana.
Sara samsi bakrokna ine
Nokgil sawil densotna ine.
Anga kajanipana,
Anga beridingpana,
Ja·de ja·onbaachim,
Jade jasokbaachim.

ME·ASANI MAHARI DOROCHAKTAIA

Ade atip rikenga, oe,
Mulde mul songenga,
Atte ketal dokade doka,
Rua sambal ruade rua.
Wilgate potade pota,
Ra·gitdoe donade dona.
Kade kajaniangbo,
Bede beridingangbo.
Silchi waokgipune
Dare warnegimune
Den'o waminjawane,
Aparang,
Su'o wapinggnine,
Boningrang.

A·CHIK PAGITCHAMRANGNI CHANANI

1. Asa, 2. Agin, 3. Josa, 4. Jogin, 5. Do'sing,
6. Minsing, 7. Minmin, 8. Gatmin, 9. Memin,
10. Singsing, 11. Juju ; 12. Gatju, 13. Rikrik,
14. Balbal, 15. Rikju, 16. Balju, 17. Keke,
18. Jamke, 19. Chokchoki, 20. Timblong.

MINGGIPIN CHANANI

1. Asa, 2. Agin, 3. Jora, 4. Jogin, 5. Ini,
6. Itom, 7. Pli, 8. Pla, 9. Prop, 10. Dilsing,
11. Dilku, 12. Dilkep, 13. Olasi, 14. Gangget,
15. Rongma, 16. Amchingdea, 17. Tospoan,
18. Degri, 19. Wa·bisku, 20. Timblong.

A·chik pagitchamrang saoni kolgrikonasan chan-ha man·aia. Ukon kol ba kolchang minga. Indak-en kolchangsa, kolchang agin, kolchang josa ine toktok done chanrongaia.

Uan chasongni kri ong·aia. Gipin gipin jolrango dingtang ong·engnaba donga.

A·CHIK PAGITCHAM-RANG-NI SAL CHANE MINGANI.

1. Sombar—Kimebal, 2. Mongolbar—Mecho-
- bal, 3. Budbar—Naringbal, 4. Bristibar—Ringring-
- bal, 5. Sukrobar—Naribal, 6. Sonibar—Nariro,
- Robibar—Chigitcho.

Ia sal chananio Asra Me·chik, Ani-Gilne minggipa Tongte miteni mingchengako knae

Nongchram me'chikrangsa mingparikchenga ine
aganani gnang.

Gipin jolrango dingtang dingtang ong'eng-
naba donga.

DEMECHIK SIO MA·GIPANI MINGE GRAPANI

Ang ' lau chijanggi chiring gana ba'achim amako,
Ang ' menil achari jamasarao bakna neng'achim
ta'mako.

Watesil mekerana donachim raniko,
Ang ' kaksi manggolsil chijanggina donachim
gitingko.

Sasam merong stike sara ropachina

Ang ' ta'mara,

Menil ginde sutike ropachina rania,

Do'chichok nabak gnang ole re'rongachim amara

Ta'bima ja'chok gnang ba'e ropachim rania.

Ta'ma gita jelchina ba'paachim ama nang'ko,

Giting gita salakkimpachina neng'achim ama gose
nang'ko.

Angko gale katangjok Balman asongona,

Chingko wate re'angjok Me'mang Chigaona.

Giting be'angjok, salakkim dongjajok.

Sara nokra sengdangjok rani weangjok.

Basako ka'gualgnok ta'ma nang'kode,

Maikai mikchi rangnok ama chingade.
 Noksulni dedrang sara roarangko,
 Nike amlangen gose uamangoniko.
 Jajumang jakarichi mikkang pa'epabo,
 Nikja gring nina gringchi sara roepabo.

A'CHIK KATTANI AGANBEWAL

Ku'sia	—Namgijani ong'a.
Ku'chia	—Dakbewal, cha'bewal ong'ja
Songjota	—Maharini bidingo namgniko daka ba nokna krong on'taia.
Jottapa, siktapa	—Madrangna dakchakani ba nokingko tariani.
Ra'gat-salgata	—Ma'ani ba ma'de ma'jongni noko maiba a'sel ong'anina uamangko alduchina cholko dake on'ani.
Deragata-nokra- gata	—Ma'ako ba ma'de ma'jongko alduchina ma'gipani demechik. ko'on'a.
Mangrea, Mangrepaka, Jadina	—Mande sio dikdiksana sakgipin mande sibokpaa.
Ku'nanga	—Sao nanga.
Ku' nangja.	—Sao nangja

- Mangtata —Sianggipa mandena rama .
regniagane mesokata.
- Okgipu tebe bi —An'tangni namgnina daka.
tena rama baka
- Arno manggisi —Simanoa uiani knaani dongja.
Tusia sarigri
- Be'entangna ka- —Bobilko warachaksona mik-
cha (koksep) wate songani.
- An'chitangna wa-
sing sine.
- Korek-balbal, —Jinma tom dakram.
- Korek-dimdim
- Walna kene du- —An'tangko on'kanga.
dape, Nokolara-
- katgenma gele
- Mikkol dare —Namgniko man'na duk chak-
cholcholo ba ani.
- Bolchong agal
be'en piloba.
- Bilbang solgaldea, —Bilbangko galde biteni bimang
Krong dosa deka gita sole mamanti bimangrang-
ko sol'chapa. Krongo grong-
rang dake chadoe chaone bi-
mang sol'a
- Niti do'pilgime —Kalimani.
sinti do'pilgime
- Jangki pang man- —Nokpanteo gakatna jang'kiko
de daka, Rebaksil mande dake sol'a aro rim'chak-
dedura kaa. nara redura dona.

Ga'akana watgate,—Maharini dakgni kam.

Besotao sokchue

Dipilok do'gagita,—Chasong gitcamni salrango
Gangguan matchok janggi tanggipani bimangrang.
gita

Chengkinako re—Chasong gitcamni mande-
dingo sika, Bi-rang mandeskarangko so'ote
skuko tongbolo rasong dakani.

gata

Chibasal —A'arakoba tipja, wachioba daja,
indakgipa chimik.

DO'O ARO MATBURUNGNİ BİMUNG.

A'chikrang do'orang aro matburunrangko bi-
mung mingjea. Maiba maiba a'sel ongrani kri bi-
mung mingmalja, katchi de'malja ine dingtang
dingtang bimunrangchi mingjea.

Matcha—Ku'simpel, miksugija, na'kam cha'gija.
Mongma—Rong'ma dal'gipa aro ki'me chaping-
grikgipa. Mapil—Jada aro ja'pel Wak—Ja.
giting, gitchi palgipa. Makkre—Nagrak aro na
chil pugija. Ranggol—Ki'me ro'gipa Matchok
Panggro Chipu nokma—Meenpa rongdingpa.
Do'bipa—Sereng ruram. Do'bima aro bi'sarang—
Sa'dipil. Ang'ke—Inda Raja Gangga Nokma. Ki-
sing—Nomesil Tomesil. Gorial-Inchachelo reng
sin gingbo. Susu—Chada-chongding. Do'pang-

gal-rusna Kalsna Do'po—Sampa-sambupa. Do'-
 reng—Zorengpa kobinpa.

GIPIN KATTARANG

Do'tekmea	—Kambe sel'gija dake bijak rekcenti rekcenta dake.
Kalawea	—Bolni cheksi bijak sel'ja.
Bijimjim ba bijima	—Bolni cheksi ba bijak bang'a.
Baorea	—Bite nangna bibala.
Ong'megra	—Mi ba misi birong gri ong'a
Ong'srota ong'a.	—Mi ba misi bang'gija bite gri ong'a.
Odorea	—Bite be'en dakgija bimang dakaia.
Stua	—Bibal mano bite dakbacheng- gipa ba bibal chongkabaa.
Sikrepa	—Bibal ba bite sal rakana gim _a a.
Balsepa	—Bibal ba bite balwa ba salni asel bite dongja.
Bidawea	—Terikni mekin chokongija don- gaia.
Mondol ong'a	—Te'rik bijak jakrimite sojronge gimaroroanga.
Balsuea	—Bibal bala bite dongja.
Mangoldata	—Bite rake aro nome brine mina.
Minsrima	—Bite charongbewal ong'e mina
Srima	—Biterangko ake minatna taria.

Rongdaka	—Biterang kraen bite daka.
Rongsika	—Biterang kraen bite daka.
Do'singa	—Te'brong ba gipin biterang minna a'bachenga.
Okrengsi sala	—Mi ba misi okgnanga.
Ama dila	—Mi ba misirangoni pangsa ba panggni dake ong'bachenga.
Gilboka	—Biterang brie mina a'bachenga.
Ajanga	—Jeko dakoba chu'soke dakja, dakrotrote galchipa, ba je biterangba gittangba minaba ong'srangja.
An'mejanga	—Gando sosiako ganchipe rama re'ode de ba kam ka'odejapakang gitchak gitchak dake saa.
Majanga, matjanga,	—Maiba wate chenganio, pak-
Matchanga	ma dim'anio ba maikoba dak-anio bimang aro rong'rangko dintang dintang daka.
Komili	—Sko kam'ani kodam.
Sawaka	—Be'en ding'prete aro sinprete (fever) saani.
Gitokgni saa	—Sal change (fever) sagipa
Koma pua kokera	—Jikgite.
Peting bora bita,	—Sina siani chinrang.
Mikron miksongsala	
Polsi	—Kosura gita ro'gipa selu.
Pongsik-ponggo	—Chri-brachi goa.
Alaksi ; rubia	—On'rakgijagipa.

Alnama	—On·rakgipa, cha·ninggipa.
Kuri	—Ka·bak aro segipa.
Ka·bak done,kuri	—Mikkango dona.
sone	
Gaea	—Nasia ba ga·aka.
Karbong	—Cha·na nalgipa ba espa galna tarigimin biap.
Sanala,cha·sinala,	—Saksa sakgipinna aro noksa cha·mattea nokgipina on·e sae cha·gijagipa.
Sarang cha·a	—Sikar ka·e ba maiba cholko dak. matburungko man·ode uni bika-kinchok ba beenni boko- niko songe chachenga.
Gimal	—Sokgipa soka.

KU·JIKSE ARO AGANMEAPA.

Kabesa-kagmal	—Ripeng daka, besa kaa.
Wena-kona	—Ramao mongma matcha roa
Roa-choa ba	kena ni bang'a.
Somson-bolbol	—Rokom rokom bringimin.
Simdimdim	—Adita chel·aoniko boldim,rong- totma ba matburungrangni ba maiba jagringko nikata.
Nobibik, Jongbi	—Ma·a apsanoni barima.
bik, Ok rongsan,	
Bikmasan	

Simbrim- simbram	—Seng'a aro andala brina (at- am aro pringna jakkala.
Chiring-chisik	—Chiringni ong'katram.
Andalsimsima	—Sepangkalao boldim, rong'tot- ma, matburung, bolchongdik ba maiba bimangko nikata.
Pripri-prapra	—Mikka wasisiana bate ga'akeng- gipa mikka.
Singsrang-bing- brang	—Maiba bimang aro ku'rang- ko rang'san nika aro knara, indiba gimaangaia.
Sari-suriya	—On'timintiba uija.
Andalsisi	—Bakrobegipa aro tu'begipa a'kolni andala.
Mikutengteng sikdikdik	—Ripenggri saksan.
Srikritik	—Mande donggija gita dakgipa biap.
A'brimandu chang diltu,	a'—Srikritikgipa biap.
Salbi jabi	—Sao on'a.
A'gital	—Sokgipa ba gital.
Ja're-jasoka	—Mangsonga biapona re'a.
Jama-jasi nanga	—Ribo nanga.
Grinna-ginna	—Apsanoniko dintangata.
Chapeka-chadika	—Dintanggrikoni re'bae a'sel ong'a aro mangsongani grioba gronggrika.
Totchaode rong- tean gijela	—Dontonggija dakode chu'soka.

- Do·bisa ma·bran—Dilgipa ba niroksandi gipa gri-
a gita, Do·bisa
ma·gri gita
- Do·reng do·ka —Depanterang ma·a pao dong-
gita bilbranga kamja.
- Jajoka-najoka —Naponggrika aro mitam guk-
jo·ongrang japrakon gilsreronga.
- Jachanga-wat- —maibakai gualani aro uiani gri
changa ong·a.
- Su·prota su·ponga—Siatna dakani aro a·kolko dak-
ata.
- Nasia-grea —Mi ba maiba chongipa bos-
turang donramoni ga·aka
suuri ba ripamchi bolbijak
wa·bijakoni tottake ga·aka.
- Mulsano sorimo, —Jik seni apsan kam. Ua gita
Chikongsana gipin gipin kamrangoba apsan
chiripa ong·a.
- Ku·on bisi, Jakon—Ku·aganaba namja, kamba
wal·ki namja.
- Bil goera —Bilak ku·rakgipa.
- Nirik-sambala —Gisikchi simsake nie donga.
- Milam atte dak- —Maiba maiba a·sel ong·ani-
aia, Attean mil- rango dolgnion dongpaaia.
am ong·aia
- Matmemang —Mahari chong·motde ong·-
chikgipa, Chi ja, chane banesa roaia.
nalsa donggipa
- Tapa gita, Pila —Apsan ong·pana man·pajaoba
gita jedake man·a dakpara.

- Atte pari nia, —Namako basee ra'a.
 Kilkok de'susaa
 Amak chi jroja, —Mandeskani aganako knachak-
 Huro bak grongja gipa ong'ja.
 Am pang busu —Dontonggija simsake dakani
 bu'e, ja pa kitik
 cham'e
 Wakja ping cha —Chratang dal batgipa.
 gipa, Chutok kol
 ringgipa.
 Ku'o bisi gnang, —Bil gnange ka gnange agangipa
 Jako silchi gnang aro dakgipa.
 Olbak kadi kae, —Kok ole cholge ra'e sal sal ta'a
 Cholge kotanie. Cho na re'aia.
 Ku'sik kotania, —Cha joljol ringjoljole re-
 Jookko olakia joljolaia gipa.
 Sila silska, Mia —Mandea mandeska.
 miska
 Gana a'gil witr, —Cholon rokom tik ong'ja.
 Seng'ki waldu ra'a
 Bima na tokko —Sakgipinni ba'gimin chigi-
 dokdiponga, minko bie mana.
 A'chang matchokko
 chang dula
 Tultual-Imba —Rang san gualgitike dakmana.
 imbi
 Wal gri andala, —Jikgri, segri branga.
 Chigri ran changa
 Aandala-mikka —Mandeko matcha chika.
 sima

Songgro-nokgro — Ong'a ba ong'ja a'selrang ba
kattarang gipangrora.

An'tangan asok, — Jekoba dakbo an'tangnasan
An'tangan golok dakaigipa.

Guraringo jong — Be'gimin gurako galaia, atte
mot pua Atte, achokkode daktai-rutaina
achokko kilding man'a.
rika

Miksmialan bra- — Ka·rakgipa bilakgipa
pong, Jakkimil
ja·kimilan wa·ge-
chong

Do·ma rangsi — Depante.

Giting rani — Demechik.

A·ba rama o·pabo — Agana gita ba ge·eta gita dak-
inoa, Ramakosa gija daksreta ba agana ge·etako
bakskara, Wal·ko gisik nanggija dakani kam.
sike donsobo inoa

Wal·bimako don-
soa

Walbimako don- — Apsan mangsongani
sobo inoa Wal·-
totkosa totsoa.

Rama bak sobo
inoa, A·ba
ramakosa bakskara

Kera ningku gnang — Ma·a baksa demechikko
on·chapa.

Gamnade chongchepa — Gamnade sunade arata
Cha·nade lau dokra cha·nade nala.

Sokme a·pal wata, ja· — Cho'on tik ong·gijagipa
ping meram rama me·chik

Ta'makuan bongera, Ku—Cha'na ringna on'ani-
stuan samdakar. chin namgijaona ong'ata

Jaktong jakjriaona, —Mongma doko matca chi-
Ding'ol gramchiaona ko ja'man chakgipa,
skang chilgipa.

Spin merong srea gita dakaia —Kimgrik ka'grikaia.
Kitik be'a,—Pangchakgnigipan dongjaha.
Nabak chota

Ku'sakon ku'gni, —A'sel ong'chongmotana bateba.
jasakon jagni. agananirang aro janganirang.
Te'egita bakaka,—Uisrapgija ba niksrapgija sia.
Mi gita ronggaka

Ja'dimdala—ja'a saade dongja, indiba dil·dil·dal-
dal dakgitika.

Na'chi rong'kol su'roka gita—Nanga kamni gimin
uiatanio re-bara.

Do'regipu suja,—Dakaba dakjawa, dakpaoba sap-
Silchi gipok matja jawa.

Me'mang okama—Basakoba basakoba nachikaleng
eng ine gam'a.

Me'mang aganskara —Mande jinma agane ka-
dinge roengoba rang'san
jripjrip dondika.

Ra·dogipa-ra·rongipa —Dal'atna aro onatna bil
gnanggipa.

Chugipako ra'ona kenchi—Onatna aro chuatna bil
bing, Ongipako ra'dona donga.
chongkambek

Gramchi suak, gramchi —jeko dakoba duk chak-
poksupsu ripamchi bena aro bimchipbena
totak totak. nanga.

A'na bikgil bikgil, China—Man'e dange cha'a ba
tenggil tenggil mingsing minggamako
man'a

Ongipako do'bok cha'a, —Obostarang gita krae
Chugipako balwa pe'a aro nie dakna nanga.

Balwagride bolba moja—Dos gride matnang agan-
Wa'a bretjaode chiba ani dongja.

Samjak gisi —Chio sia ba buga ra'a

T'a'jong cho'a —An'chara ba tileka.

Jak ro'a —Cha uraka.

Arore ba do'rerap —Aganjojogipa ba agan-
rakbegipa.

Dongdong me'a —Jik kimgijagipa pante

Dongdong me'tra —Se kimgijagipa me'tra.

Matgitchak, —Kam ong'anaba ong-
Ramasamni bol janaba dakdiligiparon-
gko mitdak-agana.

Gimal soka —Sokgipa soka.

Aganpana changpaja —An'tangko changja sapja

Studapon tang'paja ine onate aganani.

Skoan mat bitip, —Onnik-chonnike agane
ki'sangan dengreng kitik roni.

Bikga rangipa —Mande so'otrakgipa.

Be'eno amang baja, —Aratsranggipani kam.

Salki a'ki nangja, Kang-
karean gomguja, A'ki
salki nangatja

Jakpa tangka miksea, —Me'tra daknanggi pako
Mikkang sora gindea aganani.

- Kaldik-kaldam — Su·burongani biap.
 Kala mata — Tom·tomgipa mande.
 Bangbol — Mi misini jam.
 Balwa raka — Mongma doka, matcha
 chika.
 Aragong — Aratbegipa.
 Asi malja, Silara bilara — Dakmalja, ka·malja.
 Ku·sring tala, Sturaka — Rongtale aganna changa.
 Salaramchi re a' Jaju — Kata bima man·gipa.
 mangchi nika
 Re·na raka-Gona — Re·o gong·rakgipa.
 tang·a, Ja·greng raka
 Bilan jakan udare — Bil dongdaja.
 Wal·an chian sikja — Cha·na dongpaja.
 Okgipu rama — Rama dika.
 Do·kimil — Ka·pong.
 Bika dal·a — ka·meska — Ka·o nangrakgipa
 Bika soa — Ka·ting.
 Bu·suko bu·suskachi — An·tangko an·tangska gita
 ota, Do·oko do·skachi dakgipa skachisa nama
 kimala. Mongmako namgijako dakna man·a.
 chi rim·a mongmaska.
 Mikkang so·re agal — Me·trako mitele aganani.
 Bilgantong, bilgoka — Bil mangmangsan dongaia
 Ja·ripanchi nanga — Re·jojurakgipa.
 Salni do·chi chong — Salsal roaigipa.
 changna
 Reni ma·gipako — Ku·gri ku·masa ba·a Reko
 chitmitingo ku·sik agano-
 de chotomaia ine agana.

Chame'apa bolagipa,—Budepabegipa, buchuma
 Do'ki wakki gadap begipa
 chenggipa, Me'apa
 songgitcham, Me'chik-
 ma nokgitcham

Ta'maku ba sadani ma'gipako—Makgilgrisa ba'ai
 Wa'ge wa'ako man'chenggipa—Tikre abisa Tikse
 Nanosa.

Jotdodogipa,—Dolgnichin re'e ba roe katarangko
 Sudodogipa aganrurae golmalrangko da-
 kate bobil dakatgipa.

Cha'chat man chenggipa—Totmare, Kingmare,
 Ai Segri, Dotamikgri

A'gilsako bitchri bigaon,—Gorang adasa, Patang
 sam bolrangko satgipara mamasa.

Atte-gitchi aro ruao silchi sike dakcheng-rucheng-
 gipa, silskako silchi skana miskako ginde pu-
 chengana Tuara Nangpara.

A'gilsako secheng—Uokongsisa Meenpako tok-
 tokchenggipa. chenga, Rongding-
 pako nongchenga.

A'gilsako sichenggipa—Susime ma'gipa ina.

A'gilsako sakamchenggipa—Sane Pilde.

Aganani gnang : Sane Pildeni pagipako Tekko
 Raja, Malo Gitel ine mingachim. Salo Sane
 Pildeni pagipa re'suko mande dakenba ramasamo
 songe donaha. Sane Pilde saksan uko nike jagok
 jabrange kenaha. Ua rang'san ako sating sabajok,

be'en an'jrim dake sae dongengako Goera Kal-kame re'bae nikeaha. Uamang Sane Pildena ka-sachake aganangaha, "Na'a saa namna sikode so'-chimitaibo so'mikataibo." Unasa Sane Pilde para cha'chekosa so'chimit so'mikaha. Indiba Saljong katangjana, misi oko nangjana. Indaken Sane Pildeni saaba namjachim. Ja'mano cha'chatko so'chimite so'dimike niosa Saljong katangjok, misi oko nangjok aro Sane Pildeni saaba namjok.

NOKPANTE

Skangni chasongode pante me'tra rorimja. Pante sokbahaon ma'a paani noko tujaha. Songn-jatchio nokpante jamsirengesa tutoka. Nokpante; koba pante jinmasa namedal'e aro ganchang chue rika. Bilbang sol'galde, krong do'sadeke, pangsona re'bijakchi pine, jang ke pang mande dake re'ma re'baksil kae rika.

Mikoba nokatchichi re'e cha'rongja, jonga gri dakgiparang, noa namchik dakgiparanga atam pring ra'rurae, nokpante nokmikkango kokchok wate dontokgiparangona ra'bae doneronga. Ua-rangoniko saldotoke mi bijaktangtango ra'e pante jinma cha'ronga. Chirangko chonkalgipa nokpan-

teo tupagipa panterang pring atam kaberango aro laurango koronge dona. Ukon ringna aro mik-suna jakkalronga. Nokpanteo tuna kragipa badi-aba pante tujaode uko 'Botre' ba ma'mung pamung tugipa ine mingtoka, aro uandagipa mande baksa rorimbreja.

Nokpante saraona agre me'chikrang nokpanteo gakatna man'ja. Saoba gakatode dai gam-na nanga. Maiba nangbeani gimin nokpanteo gakatna nangode, nokpante nokgilchi donggipa jangkepang gitasa gakatna man'aia.

Nokpante sa'rao minongtritrit ro'rongrong dakgipa adita dalgipa ro'ongko donronga. Ua ro'ongkon atam pring de'tomsusae bilko ranta ka-ronga. Walo jajong teng'o 'e waltingaona kingking sue ba gila gosusae, tilu ba ja'kol kal susae, wa'pong sikgriksusae, suedil salgriksusae, kangkare pe'suase, top gosusae, do'reng do'bisa bal-susae, katsusae tengtengsusae, jakgitok pe'susae, aro gipin gipin susagrikanirangko dake roronga.

Panterang atam pringrango pilakni nokchin rorongja. Maiba maiba a'sel dakanirang ong-osa noko napaia. Wangalao jamegapao ; mangan mangsengao, aro nokma ganao indaka somoirang-osa me'tra panterang kusi ong'pae chrok mesae, dama doke, bangsi sike an'senge ropana man'aia.

Pilak jolrangon apsan ongaia ine aganna man'ja. Dingtang dingtang jolrango dingtang-rang donga.

JIK SE DONGANI

Skangni salrangode jik aro se kimningja. pante ekmile, me'tra ekmile donga ba roani ja-manosa jik aro se kimronga. Chawari sing'on me'asani mahari ua me'chikni ma'kringni gimin namen sandichengronga. Ua me'chikni ma'kringo mongma doka, matchachika, buga ra'a, jonja ba'a, mikgitoka, jakora, jo'ong cha'a, til'eka an'chara, songsul noksul nangrima, on'e sae cha'a, de ba-nangjae sia, sio saoba on'grik song'grikanirang aro gipin gipin kamrangko sandie nio nama ine uiahaosa ma'drang gimik namniktokosa ku'rachake chawari wata.

Me'chikni mahariba me'asani mahariko apsan sandichengesa mahari gimik namnikahaosa chawari sing'ronga. Indakesa kimgrik donggrikanirangko dakronga. Indake dakakon kiman biding dongan biding ba kimachol dongachol ine minga. Kimgrik donggrikgijagipa maharioniko jik kimrongja, se ra'rongja. Skangni chasongode A'chikrangba Sastroo sea gita ja'rika ine uina aro nikna man'a.

ASI ARO MALJA.

Munepa Sanepani siani bon'ani ja'mano, uko mangon mangsengaona pilak songrangni manderangan chu ole, merong mechu ole aro matchu matterangko moe re'angtokaha. Asi aro Maljaba ua mangon mangsengaona re'pana dopana mangsongade dongachim. Indiba re'na skang Asiara me'a pek den'chengkuna ine songni sepango donggipa burung dimchang tindikona re'ange me'apek den'mitingo matcha chagope chikako man'aha. Asian a'gilsako matcha chikako man'chenggipa ong'a ine A'chikrang aganronga.

Maljaba Munepa Sanepako mangon mangsengaona re'pana dongpana mangsongade dongachim. Indiba ang'kesep am'chengkuna ine kasi boksoriri an'cheng sa'apjaljal dakgipa wari mitdikona re'ange angkesep am'mitingo kasi mitino wari mindiko donggipa chini buga ra'ako man'aha. Maljaan chini bugachi ra'ako a'gilsako man'chenggipa ong'a ine aganronga.

Songni nokni manderang Asiko Maljako nikjani gimin burung bolgrim burung samrimoniko am'miting sandimitingo do'jinma reko reko ine mikoe Asiko matcha chikjok, Maljako chini buga ra'jok ine aganataha.

Untalsa da'ona king king do'jinmaranga reko reko (Asiko matcha chikjok, Maljako buga ra'jok) ine mikorongenga ine A'chikrang aganronga.

Songo noko mande sian salo, mangon mang-sengan salo matcha chiko, mongma doko, buga ra'o songgimikan salnimna nangrongachim Uko dakpagija an'tangna nanga kamkosa ka'skae maiba dal'bea a'selo ga'akgipa mandekon 'Asi malj a' ine aganrongenga.

GARO HILLS BA A'CHIK A'SONG.

Skang chasongni A'chik pagitcham aro ma'git-chamrang, A'chik a'songona re'bae songdong a'chachenggipa manderang indine agananirang donga.

A'chik a'songde sona sobok ong'ram, Tangka sara roram, Meminma gongrinram, Naminma manggaram ong'a.

Iako man'gope aganode, A'chik a'songde a'sal gnangbegipa aro kosako aro a'ningo gam bang-begipa ong'achim ine aganani ong'achim.

[GARO FOLKLORE PART III - NA ON DAPANI]

8704.
11.4.96.

